


# KUBIKA NIONSO

 Beno lenda vwanda. Beno zola kutuba mbote na nkokila nyonso. Kiese mingi na kuvwanda awa na nkokila yayi. Beno tala kaka yayi bweso mosi ya nene na kuvwanda awa, dibuundu yayi ya malu-malu ya luzolo, samu na kusambila Mfumu. Beto vwandaka vingila yayi, na kubasika awa, mwa ntangu, samu na ntangu ya kubundana na bantu, mpe ke sepela na balusakumunu, mpe ke tula kivuvu ti beto ke vwanda lusakumunu samu na beno bantu. Mpe mutindu sabala ke banda na kukwenda ntangu yayi, mpe kuna beto zaba ti lukutakanu ke kwisa ntangu yayi, kubanda na Kilumbu ya yiya.

<sup>2</sup> Mpe mu kuwaka kaka na manima ya midi yayi, na nzila ya Mpangi Williams, ti beto kele na kuyituka ya nene samu na Kilumbu ya yiya na nkokila. Mpangi Oral Roberts ke vwanda na beto, samu na kutuba, na Kilumbu ya tatu na nkokila. Yina ke vwanda kieleka ngitukulu ya nene samu na beto nionso, samu Mpangi Oral kele kieleka nzonzi mosi ya ngolo mingi. Mpe ya ke vwanda mbote na kumona yandi, munu mosi, dyaka, kupesa yandi mbote.

<sup>3</sup> Mpe beto vwandaka mazono na nkokila na Tempe, na Assemblée de Dieu, mu banza ti ya vwandaka, kuna na zulu. Mpe—mpe kieleka beto kuzwaka ntangu mosi ya mbote mazono na nkokila na Tempe. Mpe beto kuzwaka ntangu mosi ya mbote na mabuundu nionso yina beto kwendaka tala awa na kizunga ya Phoenix, mpe dyaka kuna na Tempe. Mpe beto ke sepela kaka mingi na bima yayi, ti beto lenda na mpasi kuzonza yawu.

<sup>4</sup> Na mpasi mu ke kuzwa siansi ya kusala yayi, mu ke kwiza kaka na nkokila mosi na konso dibuundu, mpe kutuba na bantu mpe bampangi ya balongi. Mpe ya me pesa munu mwa ntangu ya mbote ya kuzwa samu na kuvutula matondo ya bantu yayi, ba-denomination yayi ya mutindu na mutindu mpe bimvuka ya bantu. Samu ti, ya kele, bawu kele bantu ya nene yina ke simbisaka bilanga, na bilanga ya kulonga na bayinsi ya nzenza mpe bisika nyonso, mpe mutindu yayi mu lenda kuzwa mwa siansi ya kutuba mutindu mu me kuwa na zulu ya bawu, na kati ya kusepelaka mingi.

<sup>5</sup> Mpe beto me vwanda na bantu ya kimpwanza mpe. . . Mu banza, Dibundu ya Nzambi, ba-Assemblée, mpe mosi na mosi; mpe, na bayinsi ya nzenza, Quatre coins, Dibundu ya Nzambi, Assemblée de Dieu, mpe Nkumbu ya Yesu. Mpe, bawu nyonso, bawu nyonso ke monana kaka mosi ntangu beto ke vukana samu na kuzwa lukutakanu kuna na bilanga ya bitumba. Mpe, beno zaba, awa na yinzo ya lendaka vwanda na mabanza yina beto lendaka vwanda ya kuswaswana kuna, kasi ntangu ya ke kuma

na kilanga ya bitumba, na yina, ya kele ve na baluswaswanu kuna. Beno me mona?

<sup>6</sup> Ba kulisaka munu na dibuta mosi ya nene. Ya vwandaka na bana kumi. Mpe beto bana-babakala ke kota na lupangu ya manima, mpe beto ke nwana mosi na yankaka, oh, la la. Bana-babakala yivwa, mwana-kento mosi, mpe beto lendaka nwana ya kieleka. Kasi muntu mosi ve ke sala mbote na kubaka mosi ya beto, kuna na ntwala ya lupangu, samu, bawu bakaka mosi, bawu vwandaka na ba-Branham yina katukaka bisika nionso. Na yawu mu banza ti ya kele mutindu yina na bana ya Nzambi, Dibuundu.

<sup>7</sup> Awa mwa bamvula me luta, mu vwandaka na Houston, mpe beto vwandaka na lukutakanu mosi ya nene. Mpe kuna na. . . Mu vwandaka na bantu mingi yina vwandaka simbisa kuna; Mpangi Raymond Richey, mpe—mpe ba-Assemblée de Dieu, mpe—mpe bantu ya Nkumbu ya Yesu, mpe bayankaka nionso ya luswaswanu. Mpe beto kuzwaka lukutakanu ya nene. Mpe beto vwandaka na Yinzoo ya Miziki. Mbote, beto vwandaka na kiti pene ya mafunda nana, mu banza.

<sup>8</sup> Mpe ya vwandaka na mulongi ya Baptiste yina zolaka tula munu ntembe na kuswana, na Biblia, ti kubeluka ya Kinzambi vwandaka mbote ve. Mbote, mu me luta mingi na yawu. Samu na yinki beto ke zimbisa mpimpa mosi na muntu ya kukondwa lukwikilu, ntangu ya kele na mafunda ya kuvwanda kuna samu ba sambila bawu, beno me mona? Na yina yandi tulaka yawu na zulunale, ti mu vwandaka na boma ya kusala yawu.

<sup>9</sup> Mpe kiboba ya Mpangi Bosworth, yina pene ya bamvula makumi nana, yandi tubaka, “Oh, bika mu sala yawu.”

<sup>10</sup> Mpe mu banzaka na Caleb, beno zaba, “Bika mu baka mongo yayi.” Na yawu mu tubaka, “Mpangi Bosworth, mu—mu ke zola ve ti nge swana. Klisto ke zolaka ve ti beto Baklisto kuswana mosi na yankaka. Kana muntu kele muntu ya kukondwa lukwikilu, na yina, yandi kele kaka muntu ya kukondwa lukwikilu, kaka yina. Ya kele ve na kima yina beno lenda sala samu na yawu.”

<sup>11</sup> Mpe na yawu yandi tubaka, “Mbote, yinki ya kele,” yandi tubaka, “kana beto kwenda, na manima ya kutula yawu na mukanda,” yandi tubaka, “bawu ke tuba ti beto kele kaka nkonga ya, beno zaba, beno zaba ve yina beto ke na kuzonzila, kaka emotion ya kuzanguka.” Yandi tubaka, “Mu ke zola ti nge pesa munu ntangu ya mbote.” Mpe mu talaka yandi ya kutelama kuna, pene ya bamvula makumi nana, mpe mu vwandaka kaka na kivuvu na Masonuku yina.

<sup>12</sup> Mu tubaka, “Mbote, Mpangi Bosworth, kana nge lenda pesa munu diboko ya nge mpe sila na nge ti nge ke swana ve.”

<sup>13</sup> Yandi tubaka, “Oh, mu ke swana ve.” Na yina yandi kulumukaka, samu na kutuba na mupanzi-nsangu.

14 Mpe ya kieleka, beno zaba mutindu bazulunale lenda pumbuka na yawu, beno me mona. “Mpusu ya mika ya dibuundu ke pumbuka,” beno zaba.

15 Beto kele na stade, ntoto ya kukangama, mpe na nkokila yina beto kuzwaka pene ya mafunda makumi tatu ya bantu. Mpe na manima ya kwendaka kutalisa kuna, bantu yina kwisaka na ba-avion, ba-train. Mu ke tuba na beno, bawu vwandaka nata bakamela ya nkuki mosi, bakamela ya bankuki zole, bakamela ya bankuki tatu, kasi bawu nyonso vwanza kunwa na yawu mbote kisika ya kele na kivinga kuna samu na beto nyonso, mutindu mosi. Nyonso vwandaka kintwadi. Mpe ya ke kwenda. . . Mu kele kaka na lusakumunu ya nene na yawu, samu na kubanza ntangu yayi. Beno me mona, ntangu kieleka kubendama kwisaka, ya vwandaka na kima mosi beto kuzwaka kintwadi, beto nionso kwikilaka na Mpeve-Santu mpe kubeluka ya Kinzambi. Na yina bantu nionso ke kota samu na kukabula ya yandi.

16 Mpe na yina beto zaba yina salamaka na nkokila yina, mutindu Mpeve-Santu bakaka. Mpe ya kele ntangu Wanzio ya Mfumu kulumukaka. Ba bakaka foto ya yawu. Mpe—mpe na yina ya katukaka kuna na Washington, DC, samu na kusiamisa. Na yina, na manima ya yina, ba bakaka yawu na nzila ya bakumekama mpe nionso yina. Mpe George J. Lacy, yintu ya FBI, sonikaka mukanda na zulu ya yawu. Mpe yandi kele mfumu ya mikanda ya ba-empreintes digitales ya—ya FBI. “Ya vwandaka kieleka Moyo ya kulutila kimpeve. Nsemo bulaka objectif. Ya vwandaka ve psychologie.” Yandi tubaka, “Mu ke tubaka bambala mingi ti balukutakanu ya nge vwandaka psychologie, mpe. Mu banzaka ti nge vwandaka tanga mabanza ya bantu yina.” Yandi tubaka, “Kasi disu ya mekaniki ya camera yayi ke baka psychologie ve, Tata Branham. Ya me bula objectif.” Yandi tubaka, “Ya kele awa.”

17 Na yawu, kuna, ba bakaka Yawu. Ba bakaka yawu na ntwala ya yawu, mpe bambala mingi na manima ya yawu. Kaka, mu ke vutula matondo mingi na kuzaba. Bantu mingi awa monaka foto yina, mutindu yina ve? Mu banza, oh, mingi na kati ya beno kele na yawu.

18 Mu kele na kyese mingi na kuzaba ti ata mpe ti mouvement ya Pantekote na kilumbu yayi ya nsuka me tubama samu na yawu, kasi, mu ke tuba na beno, na kubakaka disolo ya Biblia. . .

19 Mu me luta kaka na disolo ya dibuundu, bamvula zole me luta, katuka lufwa ya ntumwa ya nsuka, Jean, na kisanga ya. . . ntangu yandi bikaka Kisanga ya Patmos, mpe kotaka mpe—mpe manisaka na kusonika Babuku mpe tulaka Yawu kintwadi. Ba tulaka yandi kuna samu ti yandi vwandaka basisa Masonuku ya bantumwa mpe vwandaka sala Biblia na Yawu. Mpe ya kele samu na yina ba nataka yandi na Kisanga ya Patmos. Na

manima ya kuvwanda ya kutokisa na kati ya mafuta kilumbu mpe mpimpa, mpe na manima ba tulaka yandi na kisanga. Mpe yandi kutikaka Babuku kintwadi. Mpe na ngaanda ya yina, Nzambi pesaka yandi Buku ya nsuka ya Biblia, Luzayikisu.

<sup>20</sup> Mpe na manima mu vutukaka, mu bandaka na disolo ya yandi kuna, mpe na manima yandi . . . mosi ya bilandi ya yandi, Polycarpe, Ignatius, mpe mingi ya bawu, landila tii na Martin, Irénée, Justus, Santu Colomba, landila, tii na nsungi ya mpimpa, mpe landila, mpe tii na Luther, mpe Wesley.

<sup>21</sup> Mpe mu me bakula ti, mpe na yina tii na bilumbu ya bantumwa, na bisalu yango nyonso ya nene ya Mpeve-Santu, ya kele ve na mosi ya bawu yina ke mwangisa nsemo ya mouvement yayi ya nsuka ya Mfumu, awa na bilumbu yayi ya nsuka. Beto ke bakula yawu ve, bankundi. Ya kele na bima yina ke na kusalama ntangu yayi yina lenda lakisa Nzambi, mutindu foto yina ya—ya Klisto, kaka na beto, ti ba vwandaka ve na bisadilu ya kusala yawu, na bilumbu yina. Kasi ntangu yayi muntu ke meka na kusala kima mosi, samu na kukatula na Nzambi, mpe Nzambi ke bakaka nsalulu yina mosi mpe ke siamisa Yandi mosi na nzila ya yawu. Na yawu ya ke kaka . . . Beno ke kwenda ata fioti ve na ntwala ya Nzambi, samu Yandi kele na ngolo nionso, yina kele bisika nionso, ya seko. Ya kele ve na mutindu ya kukwenda ntama na yawu. Beto ke vwanda kaka ya kulemvuka mpe ke sadila Yandi, ya kele kima ya kulutula mbote yina mu zaba na kusala.

<sup>22</sup> Mu kele na nsoni, kasi mu ke kwikila ve ti mu zaba nkumbu ya pasteur, awa na kati ya dibuundu. Mu . . . [Mpangi Griffith me zonga nkumbu ya yandi—Mu.] Mpangi Griffith, ya kieleka mu ke na kiese na kukutana na nge, mpangi-bakala, mpe ntangu ya kukwiza awa mpe kubundana yayi, samu na kuvwanda na beno, na . . .

<sup>23</sup> Beto ke zolaka ntangu nionso kutuba yawu mutindu yayi, samu na bayina ke vwandaka na Sunnyslopes, samu ti beto kele bizyeti awa, banzenza. Beto ke tubaka ti yayi kele yinzo ya beto ve. Beto kele bankuna ya Abraham, “Na kusosaka Mbanza yina Mutungi mpe Kiyidiki kele Nzambi.”

<sup>24</sup> Yayi kele yinsi ya kitoko. Mu banza ve ti ya kele na kima mutindu yina, mu me monaka ntete ve. Mpe kuzyeta pene-pene ya konso yinsi na yinza, mpe mu me monaka ntete ve kima mosi na Europe, na Italie, na Asie, kisika nyonso na Esete, yina me fwanana na Phoenix, na Arizona. Ntangu yayi, ya kele kieleka. Ya kele kisika ya kulutula kitoko yina mu me monaka ntete ve. Kasi, oh, ya ke talana mutindu bala-bala, na lweka ya yina ya ke vwanda na Millenium ya nene yina. Na yawu beto kele—beto kele. . .

<sup>25</sup> Yayi kele yinzo ya beto ve. Beto ke na kuzinga kaka awa, mpe beto me kuma na mbundana yayi kintwadi.

26 Ya kele lusakumunu samu na munu na kuvwanda awa mpe kumona dibuundu ya Nzambi kukwenda na ntwala, kivinga ya nene ya malu-malu, mpe nyonso yina. Nzambi sakumuna beno bantu! Beno vwanda ya kukwikama na Klisto. Beno bikana ya kieleka na pasteur, mpe beno sala kintwadi, muntu nyonso na diboko, samu ti mu ke kwikila ti Nkwizulu ya Mfumu me kuma pene-pene.

27 Ntangu yayi, kaka ntete beto belama na Ndinga, beto belama na Nsoniki na kisambu, na yina beto ke kulumusa bayintu ya beto na mwa ntangu fioti.

28 Kaka ntete beto sambila, na bayintu ya beno mpe bantima ya beno ya kukulumusa, ya kele na lombilu na kati awa samu na kisambu, mpe beno ke zabisa yawu na kutelemisaka diboko, kaka na kati ya ntima ya beno beno kele na nsatu ya kima mosi, mpe kutuba, “Mfumu Yesu, bambuka munu”? Mfumu ke mona konso diboko. Mu me ndima.

29 Tata ya beto ya Mazulu, beto kele na kyese mingi ti beto lenda bokila Nge “Tata,” Mvangi ya nene ya mazulu mpe ntoto, Elohim ya nene, El-Shaddai, Mupesi-Ngolo, Mudisi, Yina me Lunga na Nionso. Mpe na nzila ya Mwana ya Nge mosi ya luzolo, Yandi tubaka na beto: kana beto ke kwiza na Nge, mpe ke lomba nyonso, na kusadilaka Nkumbu ya Yandi, ti Yandi ke mona ti ya ke pesama. Mpe, Tata, beto ke kwikila ti ya kele na zulu ya bakondisyo. Kana beto lomba kima yina vwandaka mbote ve, beto lendaka vwanda ve na lukwikilu ya kukwikila ti ya ke kuzwa mvutu. Kasi kana beto lenda tala bantima ya beto na nkokila yayi, beto ke lomba ve kima yina kele mbote ve, kasi yina kele kieleka, ya kele, ti Nge ke lemvokila beto masumu ya beto nionso mpe bayimbi ya beto nionso, samu na kieleka, Mfumu, yina kele kima ya ntete.

30 Beto zola ve kumeka kukota na Mvwandulu ya Nge na disumu na zulu ya beto. Na yina, na kuzabaka ti, konso kilumbu, bampasi mpe bima yina ke yala beto, yina mpe fwana vwanda ve na kati ya mabanza ya beto, kasi, ntangu beto ke kwisa na kubanza na Nzambi ya santu, Yina mpe Bawanzio kele ya mvindu na meso ya Yandi, na yina beto zaba, Mfumu, ti beto me kuzwa ntete ve siansi kana ti beto lutila na Menga ya Yesu Klisto, mpe na yina beto kele bana ya Nzambi. Bifu ya beto ke zimbana, mutindu beto ke funguna yawu.

31 Mpe mu ke sambila, na nkokila yayi, Tata, ti Nge ke sakumuna dibuundu yayi yina me telemisa maboko ya bawu. Beno zaba yina vwandaka na manima ya mosi na mosi ya maboko yango: dibanza, nsatu, mpe—mpe motifi mpe lukanu samu na kusansa. Mu ke sambila ti Nge ke pesa mvutu na mosi na mosi ya ndombolo ya bawu.

32 Mpe ntangu yayi, Tata, beto ke sambila samu na dibuundu yayi. Beto kele na kyese mingi, ti, kisika yayi. Ntangu beto ke

tanga kuna na bilumbu ya ntete, kisika ba yinaka Baklisto, ti ba lendaka ve kuzwa dibuundu. Ti, bawu vwandaka mputu mingi, bawu zolaka tunga mosi ve kana bawu salaka yawu, mpe kumona yawu, to, kuzwaka ntangu ya mbote. Mpe ntangu yayi, bubu yayi, kumona bivinga ya nene, ya kitoko ke na kumata, ya bunkete, kisika bantu kele, lenda kota mpe kusambila Nzambi. Beto ke vutula matondo mingi samu na yayi. Mpe samu na munkayulu yina, bantu, na mosi ya kumi ya bawu mpe makabu mpe—mpe bansisani, ba me tunga yinzo yayi samu na Mfumu.

<sup>33</sup> Ntangu yayi, Tata Nzambi, mu ke sambila ti Nge ke sakumuna pasteur ya yandi, ba-diacre ya yandi, ba-administrateur ya yandi, mpe mambele nionso yina ke kwisa awa. Bika yawu kukula, mpe kukula, mpe kukula. Mpe ti, kubanda dibuundu yayi, kubanda reveil ya mutindu ya ntama yina ke kombola kiwanda, tii na nsuka. Bika ti bidimbu mpe mambu ya ngitukulu kukwisa na dibuundu yayi, ya kubeluka, mpulusu. Bika yawu vwanda mwinda samu na yinsi ya muvimba. Pesa yawu, Mfumu.

<sup>34</sup> Bika, kubanda kisika yayi, kukwenda milongi ya mbote, bantwenia ya babakala, lubokilu ya Nzambi na luzingu ya bawu, kukwenda na bilanga ya kumwangisa nsangu, kisika ba ke bokila bawu. Pesa yawu, Mfumu.

<sup>35</sup> Mpe na nkokila yayi, na yina beto me vukana kintwadi, bika ti Mpeve-Santu kukwisa, kukota na Ndinga, mpe kuna kaka Nkuna na kati ya konso ntima yina kele awa. Ti beto na lukwikilu ke losila Yawu maza, kilumbu mpe mpimpa, tii Yawu ke kula na bayinti ya nene samu na nkembo ya Nzambi.

<sup>36</sup> Belusa konso muntu ya kubela, Mfumu, yina kele awa na nkokila yayi. Vulusa muntu nionso ya kuzimbana. Vutula bantu nionso yina kele retrograde. Mpe vutula dyaka mpe fulusa dyaka bayina ba fulusaka ntete. Pesa yawu, Mfumu, samu beto me lomba yayi na Nkumbu ya Yesu Klisto, Mwana ya Nge. Amen.

<sup>37</sup> Ntangu yayi, mu kele kaka na mwa nsukinina fioti, mutindu na mumesanu. Ya vwandaka fioti na ntuala na ngaanda awa na nkokila yayi kulutula mu vwandaka yawu kuvwanda.

<sup>38</sup> Mpe na yawu beto kele, mbasi na nkokila, na kisika mosi. Mu banza ti ba zabisaka yawu yimeni. Mpe ntangu yayi, kana beno kele na dibuundu na dibuundu ya beno mosi awa, mbasi na nkokila, beno kulumuka ve. Kasi kana beno me kuzwa ve dibuundu, beto ke sepela na kuzwa beno. Beto ke zolaka ntangu nionso bantu kuvwanda na kisika ya bawu ya kisalu, ata mutindu yina. Ntangu dibuundu me zibuka, soda nionso fwana vwanda na kimvuka ya yandi mpe na kisika ya yandi.

<sup>39</sup> Mpe na yina beto kele awa samu na kutala mpe kuzwa ntangu ya nene, kaka ntete samu na lukutakanu ya Bantu ya Mumbongo. Mpe mutindu mu zabisaka yawu yimeni, Mpangi Roberts ke vwanda awa samu na kuzibula lukutakanu, samu na

Kilumbu ya yiya na nkokila. Beto ke vwanda na kiesa mingi na kukutana na Mpangi Roberts. Mpe na yina mu banza, mu banza na Kilumbu ya tanu, Mpangi Velmer Gardner ke vwanda awa. Mu zaba ve kana yandi ke zonza na nkokila yina, to ve.

<sup>40</sup> Mpe mu banza ti ba me zenga yawu samu na munu, samu na kuvwanda kuna na Kilumbu ya sambanu na suka, na madia ya suka. Mpe kana ya ke luzolo ya Nzambi, mpe samu na munu na kutuba Sabala na suka, Mu zola baka masonuku, kana ya kele mutindu yina, kana ya kele luzolo ya Nzambi: *Muntu Ya Kulutula Yimbi Mu Me Monaka Ntete*. Na yawu, mpe—mpe kuna, Lumingu na manima ya midi, mu ke zonza dyaka. Na yawu kana beno kele. . . Ntangu yayi, na Kilumbu ya sambanu na suka, ya kele ve na dibuundu, mutindu mu zaba. Mpe Lumingu na manima ya midi ya kele ve na dibuundu, mutindu mu zaba.

<sup>41</sup> Ntangu yayi, ntete mu banda, mu me zimbana ti mu ke. . . Ve. Mu ke kwikila ti Billy tubaka ti yandi kabulaka bakalati yango ya bisambu. Ya kele kieleka? Ya kele na bakalati ya bisambu yina ba me kabula awa na nkokila yayi? Mbote, yandi kabulaka yawu, na dibuundu yankaka, mazono na nkokila, samu ti mu—mu vwandaka keba bantu ntangu ya yinda.

<sup>42</sup> Mu ke longa ntangu ya yinda, bangunga sambanu to nana, kima mutindu yina, ntangu yankaka, ntangu mu ke kuma na nsuka. Ntangu yayi, mu ve. . . Na nkokila yayi, mu ke na dibanza ve ya kulonga na zulu ya yawu. Kaka. . . Na yina mu banzaka ti beto kabulaka bakalati ya bisambu, mpe na manima beto. . . beno lenda vutuka na yinzo na kati-kati ya mpimpa, na mutindu nionso, na yina na manima beto me kuzwa ndonga ya bisambu. Na yina, kana ya kele kaka ndambu ya yawu. Mpe mu zaba mingi ve, kasi ya ke lomba munu ntangu ya yinda na kutuba yina mu zaba. Na yawu, yina mu zaba, mu zola kutuba yawu mbote mingi, mu ke baka kaka ntangu ya munu na yawu, beno zaba. Ya kele mbote. Mu vwandaka sakana kaka kuna, samu ti mu—mu ke meka na kubasika, baminuti makumi yiya na tanu, to kima mosi, samu na ndonga ya bisambu.

<sup>43</sup> Mu kele kaka na mwa, Disonuku mosi awa na nkokila yayi mu zola kutanga, mpe kubaka dilongi, mpe mu ke sambila ti Nzambi ke sakumuna yawu. Kana beno zola kutanga yawu ntangu beno ke vutuka na yinzo, ya kele na Marc, kapu ya 10 mpe nzila ya 28.

*Na yina Pierre bandaka na kutuba na yandi, Tala, beto me bika nionso, mpe beto me landa nge.*

<sup>44</sup> Ntangu yayi, mu ke zola kubaka dilongi mosi, samu na kutunga mwa dibanza mosi na zulu kuna, ya: *Kubika Nionso*. Mpe kuna, na mwa ntangu fioti, beto ke sambila samu na bambevo. Mpe ntangu yayi, beno bayina me zaba Marc, kapu ya 10, beno vutukila yawu. Kaka. . . Yesu vwandaka zonza, na kutala, na kufwa makwela.

45 Mpe na manima Yandi kuzwaka dyaka kima ya ngolo na kusalama. Ya vwandaka na ntwenya ya bakala ya bimvwama yina kwizaka mbangu na Yandi, mpe tubaka, “Mulongisi ya mbote, yinki mu lenda sala samu na kuzwa Luzingu ya Kukonda nsuka?”

Mpe Yandi tubaka na yandi, “Beno zitisa misiku.”

46 Ntwenya ya bakala tubaka, “Mu me sala yayi na buntwenya ya munu.” To, “Wapi misiku?” Mpe Yandi tubaka na yandi yina bawu vwandaka. Mpe yandi tubaka, “Mu salaka yayi.”

47 Yandi tubaka, “Kasi kima mosi beno ke kondwa. Kana beno zola kuvwanda na Luzingu ya Kukonda nsuka, beno vwanza ya kulunga, kuna beno teka nionso yina beno me kuzwa mpe beno pesa yawu na bamputu. Beno baka kulunsi ya beno mpe beno landa Munu.”

48 Beto landa yawu ntwenya ya bakala kaka mwa ntangu fyoti ntete beto kota na dilongi, samu na kupesa dibanza.

49 Ntangu yayi, beno me mona, ba lombaka ntwenya ya bakala yina na kumanga nyonso, kasi yandi mangaka na kusala yawu. Mpe bantangu yankaka kana beto tula bimvwama mpe bimvwama, mpe nyonso yina, “lunungu,” kasi ntwenya ya bakala yayi vwandaka bakala ya kukula mpe dyaka vwandaka ve na Luzingu ya Kukonda nsuka. Na yawu, bantangu yankaka, lunungu ke zola ve kutuba ti lusakumunu ya Nzambi.

50 Kasi beto landa yandi. Beto ke mona yandi awa ntangu yayi na buntwenya ya yandi, ntwenya, mu banza bakala mosi ya kitoko, ya ntwenya, yina me lwata bilele. Biblia ke tuba, ti, “Yesu zolaka yandi.” Yandi fwana vwanza na konsiansi mosi ya mbote, ya mbote, ya lembami. Yandi fwana vwanza kima mosi ya mbote mingi, to yandi zolaka nunga ata fioti ve zola ya Mfumumu Yesu. Samu, ntangu Yesu talaka yandi, “Yandi zolaka yandi.” Yandi lendaka kuzwa mutindu mosi ya nzonzolo, mpe matalana ya kitoko samu na yandi, bakala mosi ya bunkete, mwana-bakala mosi ya kusungama mbote. Mpe yandi belamaka na Yesu, mu banza vwanza banza, na bukieleka, mpe yandi tubaka, “Mu ke zola kuzaba yina mu lendaka sala samu na kuzwa Luzingu ya Kukonda nsuka.”

51 Mpe ntangu yandi zolaka kwenda na yina yandi kuzwaka, samu na kuzwa Luzingu ya Kukonda nsuka, na yina kyuvu vwanza na mwelo, kana beno lenda sala yawu. Mpe kyuvu yango kele na ntwala ya mosi na mosi ya beto. Mpe kieleka Yesu lombaka yandi na kubika nyonso yina yandi kuzwaka, kubaka kulunsi ya yandi, mpe kulanda Yandi. Mpe beto zaba disolo. “Yandi kwendaka ntama na mawa, samu yandi vwanza na bimvwama ya nene.”

52 Kuna Yesu balukaka, mpe tubaka, “Wapi mutindu ya ke vwanza mpasi samu na muntu ya mvwama na kukota na Kimfumumu ya Mazulu, mutindu kamela mosi ke luta na kati ya



disu ya ntunga. Kasi yina zolaka vwanda mpasi samu na muntu, kasi,” Yandi tubaka, “na Nzambi ya kele ve na kima ya mpasi.”

<sup>53</sup> Beto landa ntwenya yayi ya mfumu. Ntangu ke landa beto ke mona yandi, na kati ya Biblia, yandi ata mbala mosi ve. . . kaka na ntangu yandi mangaka bweso ya kulanda Yesu, ntangu ba tulaka yawu na ntwala ya yandi kaka kuna.

<sup>54</sup> Beno me mona, beto zola kukangama na nyonso yina beto lenda, mpe na manima kulanda Yesu. Kasi ntangu yankaka Yesu ke zola ti beto yambula nionso, na yina beto ke tetika maboko na zulu ya Yandi. Bantangu yankaka beto ke banzaka yawu, kaka samu ti—ti beto me simba.

<sup>55</sup> Mu ke bambuka moyo na mwa kima yina mu ke tubaka ntangu nionso, na zulu ya bana ya munu zole ya bakento. Ba kele ve mwa ntangu yayi, mpe ba kele bana-bakento ya kitoko mingi. Kasi, ntangu ba vwandaka mwa. . . Mosi ya bawu kele Rebecca; yandi kele mbuta mingi. Mpe, Sarah, yandi kele mwana ya fyoti. Mpe Becky kele na meso ya bleu, mpe Sarah kele na tinta ya café. Kasi bawu zole kele bana-bakento ya papa, beno zaba. Mpe na yawu bawu ke vingila na kumona munu kukwiza na yinzo, mpe bawu ntangu nyonso ke zolaka kumona munu. Mpe na yawu Becky kele mutindu. . . ya vwandaka mutindu mosi ya yinda, mutindu ya mwana-kento. Mpe Sarah vwandaka mwa, mwa nkufi, mwa muntu mosi ya fyoti.

<sup>56</sup> Mpe na yina ba vwandaka vingila munu kuvutuka na yinzo, na nkokila mosi. Mu vwandaka ntama kuna na balukutakanu, mpe bawu zabaka ti mu ke vutuka na yinzo, na yina bawu banzaka ti bawu ke vingila fioti. Mpe kana mu vutuka na yinzo, ba zolaka kumona munu. Mbote, marchand de sable fwanaka mwangisa ntoto na kati ya meso ya bawu, mpe bawu lalaka. Mpe na nsuka ba kwendaka na mbeto, kuna na kivinga ya bawu.

<sup>57</sup> Mpe mu kumaka na nsukinina. Na yina mu kotaka, mu vwandaka ya kulemba mingi, mu kwendaka lala. Mpe na manima ya balukutakanu, mpe nionso yina, mu me lemba mingi ti mu lendaka ve kulala, na manima ya mwa basabala fioti ya lukutakanu. Mpe mu lalaka pene ya banganga zole to tatu, mu telamaka, mu kotaka na—na kivinga ya moyo, mpe mu vwandaka kaka na kiti. Mu vwandaka ya kuvwanda kuna na kiti, na suka-suka.

<sup>58</sup> Mpe na manima ya mwa ntangu fioti, Becky balukaka, na kivinga ya yandi ya kulala, mpe yandi bakulaka ti ya vwandaka nsemo ya kilumbu. Mpe yandi talaka kuna na couloir, mpe yandi monaka munu ya kuvwanda kuna na kiti. Yandi basikaka kuna na mbeto, na ngolo kaka mutindu yandi lendaka, na mwa makulu yayi ya fioti, ya kukangama na mpusu, ya yinda kaka samu na kukuma na yawu.

<sup>59</sup> Mbote, yina—yina pesaka Sarah nsoni. Mpe mu zaba ve kana bana ya nge ke salaka yawu, to ve, kasi, ya munu, beno ke kuzwa

kima mosi samu na yina ya mbuta, mpe ya zole ke baka yina ba me sadila. Mpe Sarah vwandaka lwata pyjama ya Rébecca, makulu ya nene, beno zaba, mpe ya nene mingi samu na yandi. Mpe, yandi, na mbeto yandi kwisaka, mpe makulu yina ya nene vwandaka pumbuka. Mpe na mpasi yandi lendaka kangama na Rebecca.

<sup>60</sup> Na yina Rebecca bulaka yandi na munu. Mpe yandi dumukaka na zulu ya makulu ya munu, yandi lemukaka na zulu ya munu, yandi vwandaka pene-pene ya munu, kaka mutindu. . . Yandi vwandaka na zulu ya dibolongo ya munu ya kibakala, mpe makulu ya yandi ya yinda vwandaka kulumuka na ntoto. Yandi vwandaka kieleka ya kusimba mbote-mbote.

<sup>61</sup> Ya ke bambuka munu moyo na mwa ba-organisation ya kulutila nene, beno zaba, yina ke kwisa. Beno zaba, ba vwandaka awa ntama, mutindu ya makulu ya yinda, mpe nionso yina, kieleka ya kusimba mbote-mbote.

<sup>62</sup> Mpe awa me kwiza Sarah, mwa, dibuundu ya ntwenya, beno zaba, yina vwandaka ntama mingi ve. Mpe yandi monaka ti Becky bulaka yandi—bulaka yandi kuna.

<sup>63</sup> Na yina Rebecca vwandaka na maboko ya yandi pene-pene ya munu. Yandi talaka na nziunga. Yandi tubaka, “Sarah, mpangi ya munu ya kento, mu zola ti nge zaba kima mosi.” Yandi tubaka, “Mu vwandaka awa ntete.” Mpe yandi tubaka, “Mu kele na papa ya muvimba, mpe ya kele ve na kima me bikana samu na nge.” (Bawu ke meka na kutuba na beto yawu, beno zaba, ntangu nyonso.) Yandi tubaka, “Mu vwandaka awa ntete, mpe mu bakaka papa ya muvimba, mpe ya kele ve na mosi me bikana samu na nge.”

<sup>64</sup> Mwa Sarah ya mputu losaka yintu ya yandi. Mwa kikoba ya yinwa ya yandi ya kubwa. Yandi bandaka na kukwenda, mpe masa ya meso na meso yina ya nene ya ntinta ya café. Mpe Becky kuzwaka yintu ya yandi ya kutulula na zulu ya dipeka ya munu, mutindu ya kubeze munu.

<sup>65</sup> Mu bakaka musapi ya munu mpe tulaka diboko mutindu *yina*, na Sarah, mpe basisaka dikulu yankaka. Awa yandi me kwiza, mpe me dumuka na dikulu yankaka, mpe, mbote, yandi—yandi—yandi lendaka ve kusimba mbote-mbote yandi mosi. Mwa makulu ya yandi zolaka bula ve ntoto. Kasi yandi vwandaka na dikulu, na mutindu nionso. Beno me mona? Na yina yandi vwandaka tekita mutindu *yina*.

<sup>66</sup> Mbote, samu na kukeba yandi na kubwa, mu bakaka kaka maboko ya yandi zole mpe mu tulaka yawu pene-pene ya yandi, mutindu *yayi*, samu na kusimba yandi. Mpe mu vwandaka simba yandi pene-pene ya munu, mpe yandi tulaka mwa yintu ya yandi ya ntama na munu mwa ntangu fioti.

<sup>67</sup> Yandi telamaka mpe talaka Becky, mpe tubaka, “Ntangu yayi, Rebecca, mpangi ya munu ya kento,” yandi tubaka, “Mu

zola tuba na nge kima mosi, mpe.” Yandi tubaka, “Ya lendaka vwanda mutindu yina ti nge ke na papa ya muvimba, kasi mu zola ti nge zaba ti papa me baka munu nionso.” Na yina ya kieleka.

<sup>68</sup> Na yawu ya kele mutindu beto zola. Beto zola ve . . . Beto zola ti Yandi kuzwa beto nyonso. Na yina, na yina, na nyonso, samu na kusala yawu, beto fwana tambula kaka kuna na lukwikilu mpe kukwikila Yandi, yimeni, mpe kutula kaka kivuvu. Beto lenda tendula yawu ve. Ya kele ve na mutindu ya kubangula yawu. Beto ke kwikila kaka yawu, mpe ke baka yawu mutindu yina.

<sup>69</sup> Ntwenya ya bakala yayi ya mvwama, yandi zolaka ve kukipesa yandi mosi na Klisto, mpe na yawu yandi kwendaka. Mpe beto monaka yandi, na manima, ti yandi vwandaka . . . Yandi kwendaka na ntwala mingi, tii bibumbulu ya yandi vwandaka ya kifuluka, tii yandi tubaka, “Moyo, baka kupema ya nge.” Oh, yandi kwendaka na ntwala, nyonso. Yandi vwandaka na mingi, yandi vwandaka na nsatu ya kima mosi ve.

<sup>70</sup> Kasi kima mosi salamaka. Kilumbu yina landaka beto monaka yandi, yandi kangaka meso ya yandi na difelo, yina monaka mulombi ntama kuna na ntulu ya Abraham. Ya vwandaka samu ti yandi zolaka ve kubika nyonso, samu na kulanda Mfumu Yesu.

<sup>71</sup> Kuna, ntangu yayi salamaka, mpe ntwenya ya mfumu zolaka pesa ve yina yandi kuzwaka, samu na kulanda Yesu, ya fwanaka ti Pierre bakulaka. Mu ke kwikila ti ya vwandaka yandi yina salaka nsamunu, to yifuluka kiuvu, telemisaka yawu. Mpe yandi tubaka, “Ntangu yayi, beto me bika nyonso, samu na kulanda Nge. Beto me bika nyonso. Beno tala yina beto salaka. Beto bikaka bayinzo ya beto. Beto bikaka mabuta ya beto. Beto bikaka bayinsi ya beto. Beto bikaka nyonso yina beto kuzwaka, samu na kulanda Nge.”

<sup>72</sup> Ya bandaka na kubasika na yandi. Ya lendaka vwanda ti ba nataka yandi na kisal, na kutalaka mbote Klisto, mpe nyonso yina, ti yandi . . . Yandi banzaka yawu ata fioti ve, ti yandi bikaka yinzo ya yandi. Yandi bikaka dibuta ya yandi. Yandi bikaka tata ya yandi, mama ya yandi. Yandi bikaka nyonso yina yandi kuzwaka, samu na kulanda Yesu.

<sup>73</sup> Kasi ya kele kieleka yina Nzambi ke lomba: kubika nyonso mpe kulanda Yandi. Ya kele lutumu ya Nzambi. Beto fwana sala yawu mpe. Ntangu yankaka beto fwana bika mabanza ya beto ya kieleka. Kana mabanza ya beto na zulu ya kima mosi kele ya kuswaswana na Ndinga ya Nzambi, beto fwana bika mabanza ya beto mosi mpe kulanda Yandi. Mpe mutindu kaka beto lenda landa Yandi kele kulanda Ndinga ya Yandi, kutumama na Yawu. Mpe ndombolo ya Nzambi mpe musiku ya Nzambi kele ti beto kubika nyonso mpe kulanda Yandi.

<sup>74</sup> Kasi na kusalaka mutindu yina, beto ke mona ti, bantangu yankaka, beto fwana bika bankundi ya beto. Ntangu mingi yina kele kima ya mpasi na kusala. Ntangu yayi, bantu mingi, ntangu bawu kotaka ntete na Klisto mpe kuvwanda ya kifuluka na Mpeve, mu banza, mutindu bakento, ba vwandaka kuzwa mwa mutindu ya feti yina ba vwandaka kwenda, konso nkokila *yayi-mpe-yina*, kisika ba vwandaka bula nsaka ya mbongo na kizunga. Bawu zabaka bankalani nionso, mpe nionso yina, mpe na kuvwandaka mambele ya mwa bimvuka mosi na kati ya kizunga, mpe bawu ke kwenda, samu na kubula bingo. Mpe bakento yayi, beno zaba, ke tuba kima mosi samu na yawu. Ba ke bakula yawu ve. Kasi, ntete, beno fwana bika kima mosi yina, samu ti ya kele ve mbote na kubula bansaka ya mbongo, kubula bakalati. Mpe beno fwana bika yawu kana beno landa Klisto.

<sup>75</sup> Bantangu yankaka bakento, na kati ya mabuundu ya beto, yina vwandaka lwata bilele ya mansoni, mutindu bakupe, mpe—mpe ba-salopette yayi. Mpe Biblia ke tuba, “Ya kele busafu samu na Nzambi, samu na kento na kulwata mutindu yina.” Yandi kele, ya lenda vwanda nyonso yina yandi ke banza, yandi fwana bika yawu. Bantangu yankaka beto ke mona bakento, ntangu bawu ke kota na Nzila mpe ke kuzwa mpulusu, bawu vwanda zenga nsuki ya bawu. Mpe bawu zola kuvwanda ya kuzabana mutindu bayankaka ya yinza. Kasi bawu talaka, ya kele kima ya mpasi, samu ti bawu ke bokila beno mutindu ya ntama, ntangu nyonso yina beno ke kwenda kulwata mutindu Muklisto, kusala mutindu Muklisto, kuzinga mutindu Muklisto. Ba ke bokila beno mutindu ya ntama, kasi beno fwana bika nyonso, samu na kulanda Yandi.

<sup>76</sup> Yesu tubaka, to Masonuku ke tuba, “Yandi yina ke zolaka yinza, to bima ya yinza, zola ya Nzambi kele ve na kati ya yandi.” Kieleka. Ya ke lomba, beno bika nyonso.

<sup>77</sup> Kuna, ntangu beno ke zola kubika nyonso mpe kulanda Yandi, kuna, “Kana beno ke vwanda na kati ya Munu, mpe Ndinga ya Munu ke vwanda na kati ya beno, beno lenda lomba yina beno zola mpe beno ke kuzwa yawu.” Kasi, beno lenda ve, na kuzabaka ti bima yango kele yimbi. Beno zaba ti yawu kele luvunu.

<sup>78</sup> Biblia ke telemina bawu: kubula bakalati, kunwa makaya, kunwa malafu, kulwata bilele ya mansoni. Mpe, na yina, ke tuba ti yandi kele Muklisto. Kana mpeve yina na kati ya beno ke fundisa yawu ve, na yina ya kele na kima mosi ke tambula mbote ve na mpeve yina kele na kati ya beno. Samu ti, Nzambi Yina sonikaka Ndinga kele Ndinga. Mpe Ndinga kele na kati ya beno, mpe Yawu ke fundisa beno. Ya fwana vwanda. Mpe kana ya kele ve mutindu yina, ba me vuna beno. Wapi mutindu Mpeve-Santu lenda sonika kima mosi, mpe beno ke baluka mpe ke sala mutindu yankaka na Yawu, mpe ke tuba ti Mpeve-Santu ke na kutwadisaka beno? Beno lenda sala yawu ve. Na yina,

kunwa makaya, kunwa wisiki, kubula bakalati, kuzenga bansuki, kulwata bakupe, bima yayi nionso yankaka, kele na yimbi, na disumu, mpe beno ke kuma ata mbala mosi ve kisika tii beno ke bika yawu.

<sup>79</sup> Ya ke na kukotaka na ba-mouvement ya beto ya ba-Pentecotiste. Nsoni na beno. Beno fwana vwanda na nsoni. Kuyituka ve ti beto lenda vwanda ve na reveil ya yinza ya muvimba. Kuyituka ve ti beto lenda vwanda ve na reveil ya pentecote. Kima mosi me salama. Ya kele kieleka. Beto me bwisa bibaka, mpe bima ke na kusalamaka yina zolaka salama ve. Na yina beno fwana bika nionso, samu na kulanda Klisto.

<sup>80</sup> Beno fwana bika mabanza ya beno, mabanza ya beno mosi. Beno fwana vwanda ya kusungama na Ndinga ya Yandi. Mpe ata mbala mosi ve ti Mpeve-Santu ke manga ata mbala mosi ve Ndinga mosi yina Yawu zonzaka. Mpe Biblia kele ya kusonika na nzila ya Mpeve-Santu. Biblia me tuba mutindu yina. Mpe kana...Bandinga ya Biblia kele Nzambi. “Na mbandukulu vwandaka Ndinga, Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nsuni mpe zingaka na kati-kati ya beto.”

<sup>81</sup> Ntangu yayi Ndinga me salama Mpeve, ke zinga na kati ya beto, “Samu ti Mu ke vwanda na beno, mpe na kati ya beno, tii nsuka ya yinza, nsuka ya ntangu.” Ntangu yayi, kana Nzambi mosi yina sonikaka Biblia kele na kati ya beno, beno kele ve ya beno mosi, beno kele ya kufwa na bima ya yinza, beno kele ya kufwa na mabanza ya beno mosi, mpe “dibanza yina vwandaka na kati ya Klisto kuvwanda na kati ya beno.” Kuna, na yina beno ke bika nyonso, samu na kulanda Yandi. Mabanza ya beno mosi ve; yina Yandi ke tuba. “Luzolo ya Munu ve; luzolo ya Nge, Mfumu.” Na yina beno ke banda na kusungama na Ndinga ya Nzambi.

Ba lendaka vwanda kuna ntangu ya yinda, kasi mu ke landila na zulu ya yawu mwa fioti na ntuala.

<sup>82</sup> “Kasi,” beno ke tuba, “yinki mu ke kuzwa na ntangu yina, kubika nyonso? Kubika nyonso, yinki mu ke kuzwa?”

<sup>83</sup> Beno lenda vingila yinza kuseka beno. Beno lenda vingila yinza na kubokila beno bankumbu ya kukondwa buzitu. Ba ke bokila beno kima mosi yina ba lendaka bokila beno. Ba ke vweza beno mpe ba ke manga beno.

<sup>84</sup> Yesu, samu na Yandi na kuvwandaka Emmanuel, Nzambi na kuzingaka na kati ya Yandi, ya salaka Yandi ya ngitukulu mingi na dibuundu ya Yandi mosi tii dibuundu ya Yandi mosi basisaka Yandi ntangu kaka Yandi kotaka. Ba vwandaka bayina komaka Yandi na kulunsi. Ba vwandaka bayina fundisaka Yandi. Yandi zolaka bantu. Ntima ya yandi ya muvimba vwandaka samu na bantu. Kasi Yandi zolaka kubika nyonso, samu na kulanda Nzambi.

<sup>85</sup> Mpe mutindu mosi beto fwana kubika nyonso, samu na kulanda Nzambi.

“Ntangu yayi, yinki mu ke vutuka?” Beto ke vingila ve . . .

<sup>86</sup> Beto, bantangu yankaka, mu banza ti beto milongi ke salaka yawu fyoti mingi samu na bafololo. “Oh, kwiza na Klisto, nyonso kele kitoko.” Kasi, beno me mona, ya kele ve mutindu yina, na kati ya nzila, yina ke tuba ti bima nionso kele kaka kukonwa mpasi. Samu, Muklisto ve . . .

<sup>87</sup> Biblia ke tuba, “Bayina nionso ke zingaka na busantu kati na Klisto Yesu ke mona mpasi.” Na yawu kana—kana beno ke na bampasi ve samu na luzolo ya Klisto, na yina ya kele na kima mosi ke tambula mbote ve.

<sup>88</sup> Kana dyabulu kele ve na manima ya beno, yandi me kuzwa beno. Kaka yina, samu ntangu nyonso yina yandi kele na manima ya beno, ya kele kidimbu yina yandi me kuzwa beno ntete ve. Kasi kana yandi kele ve na manima ya beno, ya kele kidimbu ti yandi me kuzwa beno. Yinga. Na yawu beno bambuka moyo, ntangu nyonso yina yandi ke bula beno, beno kele mwa kudumuka na ntwala ya yandi dyaka, mpe kulandila kaka na kukwenda.

<sup>89</sup> “Kasi bayina nionso ke zinga na busantu kati na Klisto Yesu ke mona mpasi.” Yandi tubaka, “Beno sepela, mpe beno yangalala, samu ti ba talisaka bawu mpasi mingi na baprofete yina vwandaka na ntwala ya beno.” Ya kele kieleka.

<sup>90</sup> Beno kwenda ve na kizizi ya yinda, mpe beno tuba, “Mbote, mu zolaka sala yawu ve. Mu banza, bawu—bawu, mu lenda telama kaka ve samu na muntu na kuzonzila munu, mpe kutuba mu kele mutindu ya ntama, mu kele *yayi, yina, to yankaka.*”

<sup>91</sup> Oh, beno—beno fwana vwanda na kyese mingi, na kyese samu na yawu, samu ti beno lenda nata nsoni ya Nkumbu ya Yandi. Mpe na kuzitisaka misiku ya Yandi, ya nataka beno kusala yawu.

<sup>92</sup> Kasi mu zola tuba yayi, mpe. (Sala nswalu, na nswalu nyonso.) Nzambi ke sala yawu ve, na kati ya ndwenga ve, na mfuka ya muntu nyonso. Nzambi ke vwanda ve na ntembe na muntu nyonso. Kana beno me sala yawu samu na Nzambi, beno bika nyonso, Nzambi ke vutula na beno bambala funda mosi. Kieleka. Nzambi ke futa yawu. Beno ke bika bima ya yinza, mpe yinza, mpe bima ya yinza, mpe Nzambi ke vutula na beno bambala mingi.

<sup>93</sup> Bantu yikwa kele mhangi ya yawu, awa na nkokila yayi? Mbote, beto nionso zaba ti Nzambi ke vutula yawu.

Ntangu yayi beto baka kaka mwa bantu yina bikaka nyonso.

<sup>94</sup> Beto baka, ntete, tata ya lukwikilu, Abraham. Abraham bikaka yinsi ya yandi, kima yina yandi kuzwaka, mpe nyonso yankaka. Ba bokilaka yandi na kubasika na Chaldée, mbanza

ya Ur. Mpe yandi bikaka yinsi ya yandi, yinzo ya yandi, bantu ya yandi, mpe nionso yina, mpe landaka Nzambi. Yandi zolaka kubika bima nionso, kubika yawu na manima. Yandi bikaka yinsi ya yandi—ya yandi, kima ya yandi kuna na Chaldée, na Ur. Yandi bikaka kima ya yandi, mpe Nzambi pesaka yandi yinsi ya muvimba ya nsilulu. Nzambi ke futaka ndandu ya mbote mingi. Yandi pesaka yandi, kuna kilumbu yina, ntangu Yandi kutanaka na yandi, Yandi tubaka, “Telama, Abraham. Tala esete, node, wesete, sude, mu ke pesa yawu nyonso na nge, ya kele nyonso ya nge.”

<sup>95</sup> Ya kele dyambu na Miklisto na nkokila yayi. Nzambi me pesa yawu na beto, kasi beto kele na boma ya kufiongonina yawu. Ntangu beno me kuma Muklisto, beno kele kibyadi ya konso nsilulu na kati ya Biblia. Ya kele kieleka. Nyonso yina Nzambi silaka, kele ya beno. Ya kele kaka mutindu arcade kulutila ya nene, mpe na nzila ya Mpeve mosi beto nionso me botama na kati ya arcade yayi, yina kele Klisto. Mbote, kana mu . . . Kana muntu mosi pesa munu kima mosi, mu ke tala bisika nionso mpe mu ke mona yina mu me kuzwa.

<sup>96</sup> Mu banza ti ya kele yina Baklisto zolaka sala na nkokila yayi. Beno tala yina beno me kuzwa. Kana kima mosi kele kaka mwa fioti na zulu, ti mu lendaka ve kusimba yawu, mu ke baka zuni mosi mpe mu ke mata samu na kukuma na yawu. Mpe kana kima mosi ke monana fioti, na kati ya Biblia, yina Nzambi silaka, Mu ke vwanda na makulu ya munu mpe ke mata kikalu ya Jacob tii mu ke simba yawu, samu ti ya kele ya munu. Nzambi pesaka yawu na munu.

<sup>97</sup> Kana ba silaka kubeluka ya Kinzambi na kati ya Biblia, mpe mu kele mbevo, Mu ke vwanda kuna tii Nzambi ke pesa munu yawu, samu ti ya kele nsilulu. Nzambi silaka ti mu ke bika yinza, Yandi pesaka munu Mpeve-Santu, Mu ke vwanda kaka kuna tii Yandi ke pesa Yawu na munu, samu ti Yandi silaka yawu. Kana Nzambi silaka na kupesa munu nsatu ya ntima ya munu, mpe nsatu ya ntima ya munu kele kima ya mbote, Mu ke vwanda kuna tii Nzambi ke pesa yawu, samu ya kele nsilulu. Mpe mu me bika yinza ya muvimba. Mu zola tambula na manima ya Yandi, mpe Yandi ke futa. Mu zaba ti ya kele kieleka. Ya kele kaka kieleka.

<sup>98</sup> Yinki yandi salaka? Yandi bikaka ntoto ya yandi, yinsi ya yandi. Mpe Nzambi pesaka yandi province ya muvimba, to nyonso, ntoto ya muvimba ya . . . ya Palestine. Yandi bikaka mwa kitini ya yandi ya ntoto kuna, mu banza acide kisika yinzo ya yandi vwandaka, mpe yinzo ya yandi ya ntama, samu na kuzwa nyonso yina vwandaka na Palestine. Mbote.

<sup>99</sup> Kasi kima ya ntete yandi zolaka sala kele kukabuka yandi mosi. Yandi kukabukaka yandi mosi na bantu ya yandi, baya yandi nyonso ya luzolo, bankundi ya ntama yina yandi vwanda salaka na—na kutambula bisika nyonso, bankundi ya yandi ya

bakala yina katukaka na Babylone, na yandi, mpe bampangi ya yandi nionso ya babakala, bampangi-bakento, mpe bankundi ya yandi nionso yina yandi zabaka, bampangi ya yandi ya kisalu. Ntangu Nzambi bokilaka yandi, Yandi tubaka, “Kabwana nge mosi na dikanda ya nge. Kwenda ntama na nyonso ya yawu.” Ntangu yayi, yina vwandaka mpasi, kasi yandi kukabukaka yandi mosi na dikanda ya yandi nyonso. Samu na yinki? Samu ti bawu zolaka ve kuwisana na yandi.

<sup>100</sup> Beno lenda banza ti bawu ke wisana? Bakala mosi ya kiboba awa, ya bamvula makumi sambwadi na tanu, na kento ya bamvula makumi sambanu na tanu, na kutubaka, “Nge zaba yinki? Mu kutanaka na Nzambi awa mpe Yandi tubaka na munu ti mu ke kuzwa bébé ntangu yayi, na nzila ya Sarah.”

<sup>101</sup> Na yina, bawu, nkundi ya yandi ya dokotolo, zolaka tuba, “Kiboba ya bakala yayi me katukila yintu ya yandi.” Kasi yandi sumbaka yimeni ba-bonbon, mpe nyonso yankaka, samu na kukubama samu na yawu, samu ti yandi zabaka ti yandi zolaka kuzwa yawu. Ya kele kieleka. Kima ve na yawu. Samu na yinki? Nzambi silaka yawu. Kieleka.

<sup>102</sup> Mpe kana nkonga ya bantu yina zolaka kuseka yandi mpe kubanza ti yandi me zimbisa yintu ya yandi, bawu ke sala konso mukwikidi mutindu yina. Nkuna ya Abraham nionso kele na kima ya mutindu mosi. Ya kieleka. Ntangu yankaka dibuundu ya beno ke basisa beno. Ba-club ya beno, bisika ya beno—ya beno beno kele, kubundana ya beno na quartier, bankundi ya beno ya kisalu. Bantangu yankaka nkundi ya nge ya bakala to nkundi ya nge ya kento ke manga nge. Kasi Nzambi ke lomba beno na kubika nyonso, samu na kulanda Yandi. Beno bika nyonso yina kele ya kuswaswana na Yandi, mpe kulanda Yandi.

<sup>103</sup> Ntangu yayi, Abraham, bika bantu ya yandi, yinki yandi vutukaka na yawu? Yinki me katuka na ngaanda ya yawu? Yandi kumaka tata ya bayinsi mingi. Nzambi salaka yandi tata ya bayinsi mingi. Yina mwa yandi pesaka, na yina beno tala yina yandi kumaka. Yesu tubaka, “Yandi yina ke bika . . . Munu, ke kuzwa batata, bamama, mpe nyonso yina.” Beno tala yina Abraham kuzwaka, na kubikaka nyonso mpe landaka Yandi. Yinga, tata. “Tata ya bayinsi mingi.”

<sup>104</sup> Kasi, ntete, yandi zolaka kukabuka yandi mosi na kukondwa lukwikilu nyonso, mpe ata mpe mpangi ya yandi ya bakala ya madidi, ya tiya ve madidi ve, ya dibuundu, Lot. Yandi zolaka bika yandi mosi, samu na yawu.

<sup>105</sup> Nyonso yina kele na kukondwa lukwikilu na yawu, beno fwana kukabuka beno mosi; kima nyonso, kana ya kele credo, kana beno kele na kati ya dibuundu, mpe nyonso yina beno ke tala kele credo, mpe beno kwikila ve Ndinga, mpe kana Ndinga kele ya kuswaswana na . . . Credo kele ya kuswaswana na Ndinga, beno fwana bika yawu. Beno fwana bika nyonso.



<sup>106</sup> Mpe ata mbala mosi ve ti Nzambi sakumunaka Abraham tii yandi tumamaka na Yandi. Abraham zolaka nata tata ya yandi, mpe bakala ya kiboba vwandaka na kati ya mpasi, ntangu nionso. Na nsuka, yandi kufwaka. Na yina, Lot, kuswana vwandaka mpe nionso yina. Mpe na yina kaka ntangu Abraham tumamaka ya muvimba na Nzambi mpe kukabukaka yandi mosi, mpe bikaka Lot kulandila kuna na bantoto ya mbote, kisika nyonso yandi zolaka kwenda, kuna na Sodome, na manima Nzambi monikaka na Abraham, mpe yandi tubaka, “Telemisa meso ya nge. Mu ke pesa nge kima ya muvimba.”

<sup>107</sup> Abraham vwandaka yandi yina kabulaka. Yandi vwandaka yandi yina kabulaka nyonso, samu na kulanda, samu na kulanda Nzambi. Mpe yandi kele tata ya Lukwikilu. Yandi kele yandi yina beto ke kwikilaka na kuvwanda yina kele ya kukwikama. “Ba salaka nsilulu na Abraham mpe Nkuna ya yandi. Beto kele ya kufwa na Klisto kele nkuna ya Abraham, bibiyadi na Yandi landila nsilulu.”

<sup>108</sup> Israel bikaka Egypte. Ba bikaka bayinsi ya ntama kuna na Egypte. Samu na kuzwa yinki? Palestine. Bawu katukaka na kisika yina ya mpasi kuna na Egypte, bamfumu ya bisalu.

<sup>109</sup> Mpe ya kele na bantu mingi bubu yayi, bantwenya ya bakento awa na bala-bala, ke kunwa makaya, ke kunwa malafu, mutindu beto monaka awa na—na ladyo, kilumbu yankaka yina. Pulusu yayi zolaka kwiza kangisa nkonga yango ya bantwenya ya bakento kuna, kuna na bala-bala, ba kumaka na nganzi na mpeve yina ya ntama, yina kwisaka na zulu ya bawu samu na kusala boogie-woogie yayi ya malu-malu, mu zaba ve yina ba ke bokilaka kima yango, mpe kuna na bala-bala, me kuma kilawu na mabanza ya bawu. Beno me mona? Kieleka, kana mama mosi ya ntwenya kele na ndambu ya bumuntu samu na yandi, kento mosi to bakala ya ntwenya, to mosi, kima yina kele mfumu ya kisalu yina ke twadisaka bawu na kusala yawu.

<sup>110</sup> Beno ke bika yawu, mpe Nzambi ke pesa beno makinu. Oh, la la! Ya kieleka yandi ke sala yawu. Yandi ke pesa beno mosi, kana beno lenda bika kaka yawu. Kasi beno fwana manga bima yina nionso, samu na kuzwa yawu. Beno lenda kaka ve kulandila na bawu zole.

<sup>111</sup> Yandi bakaka Palestine, Abraham salaka yawu, to Israel salaka yawu. Yandi bakaka Palestine samu na yinsi mosi. Bawu bikaka yinsi ya ntama kuna, mpe bakaka Palestine, yinsi mosi ya kifuluka na miliki mpe mafuta ya niosi. Yinga, tata.

<sup>112</sup> Yinki bawu kwendaka? Bawu bikaka mwini ya ngolo, na yisi ya mfumu ya kisalu kuna na Egypte. Yinki bawu kuzwaka, samu na kubika mwini yina ya ngolo kuna? Bawu fwana tambula na Dikunzi ya Tiya. Na kubikaka mwini yina ya ngolo kuna, samu na kutambula na kati ya Nsemo ya Tiya ya Nzambi. Yinki disolo yayi! Mu ke zola kuzwa disolo yina, beno ve? Dikunzi ya

Tiya. Kutambula na kati ya nsemo ya mwini ya yinza, kisika ba vwandaka twadisa bawu na bamfumu ya bisalu, na kukwiza kuna mpe kutambula na Nsemo ya Nzambi, na yisi ya ngolo ya Mpeve-Santu, Dikunzi ya Tiya yina vwandaka twadisa bawu na yinsi ya nsilulu.

<sup>113</sup> Kima mutindu mosi bubu yayi. Beno basika na nsemo ya yinza yayi, bima yina kele ya yinza, ke tambula na kati ya Nsemo ya Nzambi. Yawu ke twadisa beno na yinsi ya nsilulu.

<sup>114</sup> Bawu bikaka mpe banzungu ya ntama ya ayi ya Egypte, banzungu ya nsuni kuna na Egypte. Yinki bawu kuzwaka ntangu bawu bikaka banzungu yayi ya ntama ya nsuni? Bawu fwana kudya madya ya Wanzio. Mani me katuka na mazulu, samu na kubaka kisika ya kubondila.

<sup>115</sup> Ntangu yayi, kana beno me kudya kima mosi ve kasi kubondila, beno bika mu tuba na beno kima mosi, Nzambi kele na Mazulu ya kufuluka na Madia ya Bawanzio, samu na kudisa beno. Ya kieleka.

<sup>116</sup> Madya ya Wanzio, ya kele yina bawu kuzwaka na kisika ya yawu, na kisika ya kubondila ya ntama ya Egypte.

<sup>117</sup> Bawu bikaka bamaza ya poto-poto ya Egypte. Samu na yinki bawu basikaka kuna? Kunwa na Ditadi yina ba bulaka na ntoto ya kuyuma, na bamaza ya cristal ya Nzambi ya kuvedila. Bawu bikaka bamaza ya poto-poto ya ntama ya Egypte, poto-poto ya ntama ya poto-poto ya ntama ya poto-poto.

<sup>118</sup> Ya kele mutindu beto fwana sala ntangu yankaka bubu yayi. Kubika credo yina ya ntama mpe denomination, kutuba, “Bilumbu ya bimangu me luta. Bantu yina kele bilawu. Ba kele kaka nkonga ya ba-exalté.” Bika kima yina na manima, mpe kwisa awa mpe kunwa na Yinto mosi ya kufuluka na . . . yina basikaka na misisa ya Emmanuel, kisika misumuki ke kota na yisi ya maza ke zimbisa mvindu nyonso ya kubwa ya bawu. Yinga, tata.

<sup>119</sup> Bika ti masa yina ya ntama ya poto-poto, ya kuvukana nionso na ntembe, mpe bakidi-kidi, mpe kuswana, mpe mbendumuka, mpe nyonso yankaka, mpe ke kwenda na mpimpa mpe ke kuzwa basupu ya nkokila, mpe vwandaka tokisa mwa bansusu mpe vwandaka teka yawu na ba-centimes makumi tanu, madia mosi, samu na kufuta mulongi. Ntangu, kana beno kwenda awa na yisi ya misiku ya Nzambi, mpe misiku ya santu ya Nzambi, mpe kutambula na Nzambi, beno ke futa kikunku ya kumi ya beno, mpe mulongi ke kuma mbote, kana beno baka kaka nzila ya Nzambi ya kusala yawu. Kieleka. Bamaza ya poto-poto; kunwa na Ditadi.

<sup>120</sup> Bawu bikaka minganga ya Egypte, na kutubaka, “Beto kele bantu ya kulutila mayele na yinza bubu yayi.” Bawu bikaka minganga ya lunangu, samu na kuvwanda na Munganga ya Nene. Amen. Mu ke zola kumona munganga mosi bubu yayi

kulandila mutindu Munganga yina ya Nene salaka. Bantu yango vwandaka na ntoto ya kuyuma bamvula makumi yiya, mpe bawu basikaka kukondwa muntu mosi ya kulemba na kati ya bawu. Ya vwandaka ve na muntu mosi ya kulemba na kati ya bawu, bamvula makumi yiya. Ya vwandaka na mafuku zole ya bantu yina basikaka na ntangu yina. Ba-bébé yikwa me butuka na nkokila nionso? Bambevo yikwa? Mpe bawu salaka . . .

<sup>121</sup> Mu ke zola kukwenda na Docteur Moise, mpe kutala na kati ya matiti ya yandi, mpe kumona wapi mutindu ya ordonnance yandi pesaka bawu. Beno ke zola ve kumona yawu? Mu banza ti ya kele na badokotolo mingi yina ke zola kutala ordonnance yango. Mbote, mu lenda tuba na beno. Mu me tangaka yawu. Beno zola ti mu tuba na beno yina yawu kele? “Mu kele Mfumu yina ke belusaka bimbevo ya nge nyonso.” Kaka yina yandi kuzwaka. Yawu yina kaka yandi vwandaka na yawu nsatu, samu bawu bikaka minganga ya lunangu, samu na kuvwanda na Munganga ya Nene. Yinga, tata.

<sup>122</sup> Bawu katukaka kuna, bantu yina tubaka, “Bilumbu ya bimangu me luta. Ya kele ve na kima mutindu bimangu, dyaka ve.” Bawu bikaka yawu, samu na kusala yinki? Yinki bawu salaka kuna? Kuvwanda kaka na mvwandulu ya kisika bimangu ke salama, kilumbu na manima ya kilumbu. Amen.

<sup>123</sup> Bantu bubu yayi yina ke tuba ti ya kele ve na kima mutindu kimangu, ya kele na kima ke tambula mbote ve na mabanza ya bawu. Ya kieleka.

<sup>124</sup> Muntu mosi tubaka na munu, kilumbu mosi, yandi tubaka, “Mu ke kipe ve yina nge salaka. Mu ke kipe ve. Mu lenda ve, wapi mutindu nge me kuzwa kidimbu,” yandi tubaka, “Mu ke kwikila yawu ve.”

<sup>125</sup> Mu tubaka, “Kieleka ve. Ata mbala mosi ve ti nge ke mona yawu. Nge kele kaka ya kufwa meso mingi na kumona yawu.” Ya kele kieleka. Mu tubaka, “Ya kele ve samu na bantu ya kukondwa lukwikilu. Ya kele samu na bakwikidi. Bakwikidi ke mona yawu.” Ya kele kieleka.

<sup>126</sup> Muntu mosi tubaka na munu, kilumbu mosi, kutanaka na munu na bala-bala, yandi tubaka, “Nge kele na foti na Malongi ya nge.”

Mu tubaka, “Ya kele Biblia.”

<sup>127</sup> Yandi tubaka, “Nge kele na foti.” Yandi tubaka, “Na yina, mu ke telemina nge.” Yandi tubaka, “Na yina kufwa munu meso. Paul kufwaka meso ya bakala mosi kilumbu mosi.” Yandi tubaka, “Kufwa munu meso.”

<sup>128</sup> Mu tubaka, “Mu—mu—mu lenda sala yawu ve. Nge kele yimeni ya kufwa meso. Yinga. Nge kele. . . Wapi mutindu mu lenda sala yina tata ya beno, dyabulu, me sala yimeni?” Ya kele kieleka. “Beno kele yimeni ya kufwa meso.” Muntu ke tuba kima

mutindu yina, kele—kele ya kufwa meso mingi, yandi zaba ve nsemo ya kilumbu na mpimpa. Yandi lenda ve kuswasikisa na kati-kati ya zole, Luzingu to lufwa. Ya kele kieleka kufwa meso. Yinga, tata. Yinga.

<sup>129</sup> Munganga ya Nene vwandaka na bawu, mpe bawu monaka bimangu kusalama. Kieleka.

<sup>130</sup> Bilandi, yinki bawu bikaka? Bawu vwandaka na ba-filet, bambisi. Bawu bikaka bambisi ya bawu, samu na kutambula na Yandi, mpe kumona bidimbu ya Yandi, mpe bimangu, mpe ngolo ya Yandi, ya vwandaka Mesiya. Muntu nyonso yina zolaka pesa ve kilumbu mosi kele kuloba, samu na kulanda yawu, ya kele na kima ke tambula mbote ve. Bawu bikaka ba-filet ya bawu, ya kufuluka na mbisi. Bawu bandaka na kubenda, mpe bawu kuzwaka kisika ya kulutula nene yina bawu kuzwaka ntete ve. Mpe bawu bikaka konso kitini ya yawu, samu na kulanda Yandi, samu bawu kwikilaka na ntima ya bawu ti Yandi vwandaka Mesiya. Mpe bawu zolaka kulanda Yandi, samu na kumona kana bidimbu zolaka landa Yandi mutindu Mesiya. Mpe bawu zolaka mona yawu.

<sup>131</sup> Mu ke bika kima mosi na yinza, mu ke kipe ve yina ya kele, kumona Yesu Klisto kutalana Yandi mosi, mingi-mingi ntangu yawu me monisama na luzingu ya munu, ti mu zaba ti mu me luta lufwa na Luzingu, mpe mu zaba ti Yandi kele Mesiya. Mu zaba, na kubakaka Yandi na Ndinga ya Yandi, ti Yandi me vulusa munu na luzingu ya disumu. Mpe mu zaba ti Mpeve-Santu ke zingaka na kati ya munu. Mu ke mona bidimbu ya Yandi, bisika nyonso, ke lakisa, ti Mu zaba ti Yandi kele mutindu mosi mazono, bubu yayi, mpe kukonda nsuka. Beno bika nyonso, mu zola kubika kima mosi.

<sup>132</sup> Mu vwandaka ya organisation ya mbote, dibuundu ya mbote, mosi ya kulutula mbote yina kele na kizunga. Kasi bawu tubaka, “Billy, nge ke zimbisa mabanza ya nge mpe nge ke kuma exalté.”

<sup>133</sup> Kaka kuna, mu tubaka, “Nge lenda baka kaka kalati ya munu ya mbundana na ntangu yayi, samu ti mu ke landa Mpeve-Santu.” Ya kele kieleka. Kieleka.

<sup>134</sup> Mpe beno fwana bika nyonso, ya kele kieleka, samu na kulanda Yandi. Kasi yandi yina ke bika nyonso, mpe ke landa Yandi, Nzambi ke futaka na balusakumunu ya lutondo ya bimvwama. Ya kele ve na kima ya kufwanikisa na yawu. Mbote mingi.

<sup>135</sup> Ntangu yayi, bilandi bikaka bampwasa ya bawu, mpe bampwasa ya kufuluka na bambisi, kimalu ya bawu. Bawu ke bika bawu, samu na kulanda Mfumu Yesu, samu na kumona ngolo ya Yandi, kumona kidimbu. Bantu yina longukaka. Bawu zaba yina Mesiya zolaka sala. Ba tangaka, kuna na kati ya Biblia. Ba bakulaka kaka yina Mesiya zolaka kusala. Ba zabaka ti ya vwandaka ntangu samu na yawu na kusalama. Mpe ntangu ba

monaka Muntu yayi kukota na kosalu, Yina me lunga na foto, na yina ba kubamaka samu na kubika nionso, samu na kuwa yina Yandi zolaka tuba. Samu, kana ya vwandaka Mesiya, na yina ya vwandaka Luzingu samu na bawu, samu ba bokilaka bawu na kulanda Yandi. Na yina bawu bikaka bima nionso.

<sup>136</sup> Mutindu mosi ya kele bubu yayi, kana Yayi kele kieleka, kana Nsangu yayi ya mbotika ya Mpeve-Santu na bilumbu yayi ya nsuka, kisika wapi Yandi tubaka ti Yandi ke mwangisa mvula ya ntama mpe ya nsuka na zulu ya beto. Kana bima yayi kele ya kusungama, Yawu ke pesa mvutu na bima nionso. Beno landa Yawu.

<sup>137</sup> Yesu tubaka, “Bidimbu yayi ke landa bayina ke kwikila. Yandi yina ke kwikila na Munu, ata ti yandi me kufwa, kasi yandi ke zinga. Mpe muntu nionso ke zinga mpe ke kwikila na Munu ke kufwa ata fioti ve. Yandi yina ke kwikila na Munu, yandi mpe ke sala bisalu yina Mu ke sala.” Kieleka.

<sup>138</sup> “Beno kwenda na yinza ya muvimba, na konso kivangu. Bidimbu yayi ke landa bayina ke kwikila. Na Nkumbu ya Munu ba ke basisa bampeve ya yimbi, ba ke tuba bandinga ya malu-malu, ba ke simba banioka. Bawu ke kunwa manganga ya yimbi, yawu ke sala bawu yimbi ve. Kana bawu tentika maboko ya bawu na zulu ya bambevo, bawu ke beluka.” Yawu yina Yandi tubaka.

<sup>139</sup> “Mutindu Tata fidisaka Munu, mutindu mosi Mu ke fidisa beno.” Tata yina fidisaka Mwana, kwendaka na Mwana, mpe vwandaka na kati ya Mwana. Yesu yina ke fidisa muntu, ke kwenda na yandi, mpe kele na kati ya yandi, samu na kusala mpe kusala bisalu mutindu mosi. “Tala, mu kele na beno ntangu nyonso, tii nsuka ya yinza. Mpe bisalu yina Mu ke sala beno mpe ke sala.”

<sup>140</sup> Mpangi-bakala, kana ya kele ve mbote mingi kulutila bacrede ya ntama mpe bima ya yinza, mpe kuvwandaka mambele na ndambu yankaka kuna yina ke manga Yawu nyonso! Mbote, mu banza ti beto fwana vwanda bantu ya kulutila kiesa na yinza, kumona Nzambi ya moyo kutambula pene-pene ya beto mutindu yayi; na kuzabaka ti beto me bika nionso, samu na kulanda Yandi. Amen. Yina ke sala ti mu kuwa musambidi. Beno bika nionso, samu na kulanda Mfumu Yesu. Mutindu mosi bubu yayi, beno fwana bika nionso. Kaka mutindu bawu salaka kuna, beno fwana sala, mpe.

<sup>141</sup> Ntangu yayi, beno ke zonzila na muntu yina ke bika kima mosi, beto tala yina, samu na Yesu, Yesu bikaka samu na beto. Yesu pesaka nyonso. Yandi vwandaka na yinzo na Mazulu. Mpe Yandi pesaka yinzo ya Yandi na Mazulu, mpe kwizaka na ntoto, mpe vwandaka ve na kisika ya kutula yintu ya Yandi. Ya kele kieleka. Yandi kumaka yisi mingi, ti Yandi vwandaka ve- . . . mputu mingi, tii Yandi vwandaka ve na mbeto ya kulala kuna.

Yandi tubaka, “Mibaku kele na mabulu, mpe bandeke kele na mupepe . . . ya mupepe, kele na mazanza, kasi Mwana ya muntu kele ve na kisika ya kutula yintu ya Yandi.” Beno me mona? Kasi yinki Yandi kuzwaka samu na yawu? Ba matisaka Yandi na zulu mingi ti Yandi fwana tala na yisi samu na kutala mazulu.

<sup>142</sup> Yandi kwizaka na yinza, bakaka nkumbu ya yisi mingi yina ba zolaka nata na yinza. Yandi vwandaka na nkumbu ya yisi mingi, bakaka nkumbu ya yisi mingi, yina ba bokilaka Béelzébul. Béelzébul kele. . . Ntangu bawu monaka Yandi ke swasikisa bampeve yina kuna mutindu yina, bawu tubaka, “Yandi kele nganga-nkisi. Yandi kele Béelzébul, diabulu.” Kuzabisa mambu na ntuala kele diabulu. Mpe ba bokilaka Yandi dyabulu, yisi mingi ya nyonso. Yandi vwandaka na nkumbu ya yisi mingi.

<sup>143</sup> Yandi kwendaka na mbanza ya yisi mingi. Mpe muntu ya kulutila fyoti na kati ya mbanza talaka na yisi na zulu ya Yandi; Zachée, ya kele—ya kele kieleka, na Jéricho. Nzila nyonso, kieleka yandi salaka. Yandi vwandaka na nkumbu ya yisi mingi yina vwandaka na ntoto. Yandi kwisaka na yinza na “makangu,” ba bokilaka Yandi, samu bawu ke kwikilaka kieleka ti Bébé yango butukaka na ngaanda ya kimvuka ya makwela ya santu. Yandi vwandaka na yawu samu na kunwana, na kubanda. Na yina ba bokilaka nkumbu ya Béelzébul, ya kulutila yisi yina ba zolaka kuzwa. Yandi bikaka kisika ya Yandi ya mazulu, mpe kwizaka baka yawu.

<sup>144</sup> Kasi Nzambi pesaka Yandi Nkumbu na zulu ya konso nkumbu yina ba me bokila na Mazulu, konso nkumbu yina kele na nkumbu na ntoto, tii kuna dibuta ya muvimba na Mazulu mpe na ntoto kele na nkumbu ya Mfumu Yesu. Alleluia! Yawu yina. Yandi bikaka; ba pesaka Yandi musendo. Kieleka, Yandi salaka yawu. Mbote mingi.

<sup>145</sup> Yandi kwizaka na ntoto, Mvangi ya mazulu mpe ntoto, mpe Yandi vwandaka na kima ve ya kudya. Satana mekaka Yandi, mangaka madia samu na beto, kasi Yandi kuzwaka madia yina bayankaka zabaka kima mosi ve samu na yawu.

Kilumbu mosi Yandi tubaka mutindu yina. “Mu ke na madia.”

Yandi tubaka, “Samu na yinki Nge ke kwisa ve, kudia?”

<sup>146</sup> Yandi tubaka, “Mu ke na Madia yina beno zaba ve.” Ya kieleka. Yandi vwandaka na Madia yina bawu zabaka kima mosi ve.

<sup>147</sup> Awa na zulu ya ntoto, Yandi vwandaka ve na kisika ya kubumbama, ba tubaka, ata kisika mosi ve, ata yinzo mosi ve, kima mosi ve vwandaka ya Yandi. Kasi beno zaba yinki? Yandi kumaka Kiswamunu samu na mosi na mosi ya beto. Nzambi salaka Yandi Kiswamunu, samu na dikanda nyonso ya bantu.

Yandi vwandaka ve na kiswamunu ya Yandi mosi, kasi Yandi kele Kiswamunu ya beto.

<sup>148</sup> Bawu vwandaka zonzila mingi samu na yina me tala kiswamunu ya ba-bombe. Oh, la la! Beto me kuzwa mosi. Yina kele kieleka. Kiswamunu ya ba-bombe, kukota na kati ya dibulu na kati ya ntoto. Mpe ba ke tuba na munu, “Ba-bombe yina ke bula mpe ke panza dibulu mosi na kati ya ntoto, na bametele makumi yiya na tanu na mudindu, samu na nkama mosi na ndambu ya bametele carré.” Na yina, ya ke buka konso mukwa na kati ya beno, kana beno vwandaka na kati-kati ya ba-kilometre na kati ya ntoto. Ya kieleka, ya ke vwanda, bisika nionso. Kasi beto kele na Kiswamunu. Klisto kele Kiswamunu ya beto. Amen.

<sup>149</sup> Mutindu mu tubaka na nkokila yina, bawu vwandaka, Russie vwandaka kukikumisa mingi samu na bunene ya bawu, kondisyo, “Beto ke tulaka muntu na kati-kati ya mupepe, ntete.”

<sup>150</sup> Mu kele ya kuswaswana na yawu. Beto vwandaka na Mosi na kati-kati ya bamvula mafunda zole. Amen. Kieleka. Yinga, tata. Musambidi, yinga, tata, yina ke kota na Mazulu mpe ke vutuka, na . . . kaka mutindu sekonde mosi. Kieleka. Beto kele na Muntu na kati-kati ya espace. Ba kele na kima mosi ve. Yinga, tata. Kieleka. Mbote mingi. Beto ke mona ti Yandi vwandaka ve . . . Yandi zolaka kuma Kiswamunu samu na beto nyonso.

<sup>151</sup> Yandi pesaka Bumwana ya Yandi, na kati-kati ya Yandi mpe Tata, samu na kusala disumu samu na beto. Beno zaba yawu? “Yandi zabaka ata disumu ve; kumaka disumu samu na beto. Ba tulaka masumu ya beto na zulu ya Yandi.” Yandi pesaka Bumwana, samu na kukuma disumu, ntangu yayi Yandi lenda sala bana ya babakala misumuki. Amen. Yina kele kitini ya mbote: baka misumuki mpe sala bana-babakala, ntangu Yandi pesaka Bumwana ya Yandi samu na kukuma disumu, ntangu yayi Yandi ke baka misumuki mpe ke sala bana na kati ya bawu. Amen. Wapi bweso! Yinga, tata.

<sup>152</sup> Nzambi ke vwanda ve ya kusemba na kima mosi. Ve, tata. Beno lenda sala yayi ve, samu ti Nzambi ke mona yawu. Mwana ya Yandi kumaka munkayulu ya disumu, ti Yandi lendaka sumba ntangu yayi, baka misumuki mpe kusala bana ya Nzambi na kati ya bawu. Wapi kima ya kitoko ya kele. Yinga!

<sup>153</sup> Ntangu yayi, yinga, tata, Yandi—Yandi pesaka ngolo ya Yandi. Yandi kumaka ya kulemba, ti Yandi lendaka vwanda ngolo ya beto. Yandi kele Ngolo ya beto nyonso ya kulunga. Beto kele na nsatu ya ngolo yankaka ve kasi ngolo ya Mfumu Yesu. “Yandi kele Ngolo ya munu kubanda kilumbu. Kukondwa Yandi mu ke kubwa,” tubaka poète. Wapi mutindu ya kele mbote mingi!

<sup>154</sup> Yina beno ke bika; yina beno ke kuzwa, samu na yina beno me bika! Oh! Beno ke bika yinza. Beno ke bika mabanza ya beno

mosi. Beno bika bantembe ya beno. Beno bika kidi-kidi ya beno. Beno bika yawu, mpe beno yamba Yandi. Beno kwikila Yandi.

<sup>155</sup> Beno tuba, “Ntangu yayi, ya kele mutindu yina? Bilumbu ya bimangu me luta?” Beno bika dibanza ya mutindu yina. Beno kwikila yawu.

<sup>156</sup> Muntu mosi tubaka, “Yesu kele kieleka Munganga, to yayi kele kaka nkonga ya bantu ya yintu yina kele na yawu?” Kubika kaka dibanza yina, kilumbu mosi.

<sup>157</sup> “Ntangu yayi, wapi mutindu beno ke zaba kana ya ke vwanda kieleka to ve?” Ya kele nsilulu. Ya kele mutindu beno zaba.

<sup>158</sup> Beno ke tuba, “Oh, mu ke kwikila ti Mpeve-Santu vwandaka samu na bantu ntama kuna, ntama mingi ve, kaka samu na bilandi kaka.” Oh, ya lenda vwanda ve. Na yina, kana ya ke sala yawu, Biblia ke swaswana na yawu mosi.

<sup>159</sup> Pierre tubaka, na Kilumbu ya Pantekote, “Beno balula ntima, mpe beno botama mosi na mosi ya beno na Nkumbu ya Yesu Klisto samu na mulemvo ya masumu, mpe beno ke kuzwa dikabu ya Mpeve-Santu. Samu nsilulu kele samu na beno, samu na bana ya beno, mpe samu na bayina kele ntama, ya mingi Mfumu Nzambi ya beto ke bokila.” Na yina ya kele nsilulu ya Nzambi, ti beto lenda, mutindu mingi Nzambi ke bokilaka na Mpeve-Santu, beno kele na muswa ya kukwiza. Beno bika kaka mabanza ya beno ya Yawu, mpe beno baka Ndinga ya Nzambi yina ba me tuba samu na yawu.

<sup>160</sup> Beno ke tuba, “Ya kele na kima mutindu, yina bantu lenda zonza na bandinga, to yina kele kaka mwa bulawu, to mwa makelele bawu vwandaka sala?” Beno bika kaka mwa mabanza ya beno mosi.

<sup>161</sup> Yesu tubaka yayi, “Bidimbu yayi ke landa bayina ke kwikila. Bawu ke zonza na bandinga ya malu-malu.” Biblia me tuba mutindu yina. Yinga, tata.

<sup>162</sup> “Mpangi, bidimbu yayi yina mu ke mona na—na balukutakanu, ya lendaka vwanda Nzambi?” Kieleka, ya lendaka vwanda. “Mbote, mu monaka bantu yina zingaka luzingu ya mutindu mosi, mpe bawu kwendaka mpe sambilaka samu na bambevo, mpe bawu belukaka. Mu . . .”

<sup>163</sup> Yesu tubaka, “Muntu ve lenda sala kimangu na Nkumbu ya Munu, lenda mbala mosi na kuzonza nsemu na Munu.” Ya kele kieleka.

<sup>164</sup> Kana muntu kele na foti, na kubakaka dikabu ya Nzambi mpe kusala kima ya yimbi, Nzambi ke sala na yandi. Kasi ya kele Nzambi, kaka mutindu mosi. Kieleka, ya kele. Samu ti yandi kele muntu ya luvunu, ya fwana sala beno kulezima mbote. Beno lenda ve kuzwa . . . Kaka mutindu beno lenda kuzwa ya



kieleka . . . Dollar ya yimbi, ya fwana vwanda ya kusala na mosi ya kieleka.

<sup>165</sup> Mpe muntu nyonso ke tuba, “Mu ke kwenda ve na dibuundu. Mu zola ve kukwenda na dibuundu. Ya kele na bantu mingi ya luvunu.” Na yina, beno kele fioti mingi kulutila bawu kele. Beno ke meka na kubumba yawu na manima ya bawu. Kana beno lenda kota na manima ya bawu, beno kele fyoti mingi kulutila bawu. Ya kele kieleka.

<sup>166</sup> Mu tangaka mwa mukanda mosi na zulunale kilumbu yina, kisika kiboba mosi ya bakala . . . Yandi vwandaka ya kufwa makutu, baba, mpe mpofo, mpe yandi kwendaka na lukolo ya Lumingu konso Lumingu. Mpe bawu yufulaka yandi, na nzila ya braille, bawu tubaka, “Samu na yinki nge ke kwendaka na yinzo-Nzambi? Nge lenda kuwa ve yina mulongi me tuba. Beno lenda kuwa ata mosi ve ya minkunga. Samu na yinki beno ke kwendaka na dibuundu?”

<sup>167</sup> Mpe yandi tubaka, “Mu zola kaka kubika muntu nyonso kuzaba wapi lweka mu kele.” Mu zola kaka kubika dyabulu mpe muntu nyonso yankaka kuzaba wapi lweka yandi vwandaka. Mu banza ti ya kele mbote. Yinga, tata.

<sup>168</sup> Yinki yankaka Yesu salaka? Yandi pesaka mpe bikaka Luzingu ya Yandi mosi. Yandi pesaka Luzingu ya Yandi, samu na kuvulusa beno mpe munu. Samu ti Yandi—ti Yandi pesaka luzingu ya Yandi . . . Yandi zolaka tula yawu ve. Yandi salaka yawu na luzolo. Yandi zolaka sala yawu ve, kasi Yandi salaka yawu na luzolo, samu ti Yandi zolaka vulusa beno. Mpe ntangu yayi Yandi kele kaka yina lenda vulusa beno. Ya kele na kima yankaka ve yina lenda vulusa beno.

<sup>169</sup> Mu zaba ti ya kele na denomination yina ke tubaka ti dibuundu ya bawu ke vulusa beno. “Beno me kuzwa mpulusu na nzila ya dibuundu.”

<sup>170</sup> Beno me kuzwa mpulusu na nzila ya Yesu Klisto to beno me zimbana. Yinga, tata. Kima mosi ve beno lenda sala, kima mosi ve beno lenda sala, beno balula kaka ntima na disumu ya beno. Yesu Klisto kele Mvulusi. Yinga, tata. Yandi pesaka, Yandi pesaka luzingu ya Yandi samu na beno.

<sup>171</sup> Ntangu yayi, mu banza ti, bubu yayi . . . Na yina beto ke sukisa, beto lenda tuba yayi. Ti, ya me tala beto, kuna, ti beto ke pesa luzingu ya beto mpe nyonso ya beto, mpe ke bika nyonso yina kele yinza, nyonso yina kele kukondwa busantu, kukondwa lukwikilu ya beto nyonso, mpe nyonso, samu na kulanda Yandi mutindu bilandi yango kusalaka. Beno zola ve kusala yawu? Beno landa Yandi, samu na yinki? Kumona bidimbu ya Yandi ya nene ya Nkwizulu ya Yandi.

<sup>172</sup> Ntangu yayi, beno bambuka moyo, Biblia silaka, ti, na bilumbu yayi ya nsuka, kaka pene-pene ya ntangu, ya ke vwanda na Nsemo yankaka ya Muklisto ke basika. “Mvula ya ntama

mpe ya nsuka ke vukana.” Profete tubaka, “Ya ke vwanda na Nsemo na ntangu ya nkokila. Ya ke vwanda na kilumbu yina lenda bokila ve kilumbu to mpimpa.”

<sup>173</sup> Wapi mutindu ya kilumbu ya kele? Mutindu ya mvula, ya lubungi, na kilumbu ya madidi. Mwini ke sema, ya kieleka, kuna na zulu ya dibungi mpe matuti ya kele na mwini ke sema. Mpe na nzila ya yawu, dibungi nyonso, kasi ya ke pesaka nsemo, samu ti beno lenda kutambula, kumona mutindu ya kubaluka.

<sup>174</sup> Ya kele samu na yina beto me kuzwa bamvula mpe bamvula, bamvula mafunda zole. Beno me mona? Beto me tambula na lukwikilu, mpe beto me banza, “Mbote, ya kele mbote mingi. Uhuh. Beto ke kwikila, mpe beto ke kuma ya dibuundu, mpe beto ke tula nkumbu ya beto na buku. Mpe ya kele mbote mingi. Beto ke kwikila. Beto ke mona ve bima yayi mutindu Yandi salaka na bilumbu yina, ntama kuna.” Bawu tubaka, “Bayina nionso me kwenda. Ya me vutuka.” Mpe ya vwandaka mutindu yina samu—bankama na bankama mpe bankama ya bamvula, kaka kilumbu ya mudidi.

Kasi Yandi tubaka, “Na ntangu ya nkokila, ya ke vwanda na Nsemo.”

<sup>175</sup> Ntangu yayi, mwini mosi yina ke basikaka na Este kele mwini mosi yina ke lalaka na Weste. Yesu mosi yina vwandaka . . . tsyamunaka Mpeve ya Yandi na Esete, na zulu ya bantu yango, kele Yesu mosi yina kele na bilumbu yayi ya nsuka, yina ke mwangisa Mpeve ya Yandi, ya kele na zulu ya bantu ya Wesete. Yandi silaka yawu.

<sup>176</sup> Yandi salaka nsilulu. Yandi tubaka, “Mutindu ya vwandaka na bilumbu ya Lot, mutindu mosi ya ke vwanda na nkwizulu ya Mwana ya muntu.”

<sup>177</sup> Mutindu ti Nzambi monisamaka Yandi mosi na kati ya nzutu ya muntu, vwandaka kuna mpe kudyaka na Abraham, na mukongo ya Yandi ya kubaluka na tenta, mpe tubaka na Sarah yina yandi vwandaka banza, na kati ya tenta. Yandi tubaka na Abraham yina vwandaka nkumbu ya yandi, mpe yina vwandaka nkumbu ya Sarah, mpe mutindu ti Yandi zolaka kwiza kutala bawu. Mpe Sarah kukwikilaka yawu ve, mpe sekaka, na kati ya tenta. Mpe Wanzio tubaka, “Samu na yinki Sarah me seka?” Na kati ya tenta, na manima ya Muntu.

<sup>178</sup> Yesu tubaka, “Mutindu ya vwandaka na kilumbu yina, mutindu mosi ya ke vwanda na nkwizulu ya Mwana ya muntu.”

<sup>179</sup> Mutindu mu ke tubaka yawu bambala mingi, mu ke tubaka mazono na nkokila, mu zola tanga yawu diaka. Ya kele ntangu nyonso na bakalasi tatu ya bantu, ntangu nyonso, mutindu Cham, Sem, mpe bantu ya Japhet, bana tatu ya Noé. Nzila nyonso, ya kele—ya kele na bakalasi tatu ya bantu. Ntangu yayi beto ke baka bawu mutindu yayi: muntu kukondwa lukwikilu, mukwikidi ya kati-kati, mpe mukwikidi. Ntangu yayi ya kele

mutindu ya ke vwandaka yinda. Ya salaka kima mutindu mosi kuna. Yesu tubaka, “Mutindu ya vwandaka na bilumbu ya Sodome, mutindu mosi ya ke vwanda na yayi.”

<sup>180</sup> Abraham, yina bikaka nionso, samu na kulanda, ntangu yayi yawu yayi, kaka kuna. Yandi simbaka nsilulu yina bamvula mingi mpe bamvula, bamvula makumi zole na tanu. Yandi yayi awa, na bamvula nkama mosi ntangu yayi. Mpe yandi kele awa na bilanga ya kulonga. Mameme ya yandi ke na kukwendaka, mpe ata maza ve. Mpe, Lot, vwandaka zinga kuna na bima nionso yina yandi vwandaka zola. Mpe awa vwandaka Sarah, kilumbu mosi kento ya kulutila kitoko na yinsi, mpe, awa yandi kele ntangu yayi, ya kubumba.

<sup>181</sup> Mpe mu banza ti Mama Lot vwandaka na bansuki yayi ya malu-malu ya maza, beno zaba, mpe bima yayi nionso. Yandi vwandaka zinga kaka na bumvwama kuna. Yandi vwandaka kento ya mfumu, mpe yandi vwandaka ya dibuundu yina vwandaka dibuundu ya nene. Yinga, tata. Mpe na ntembe ve ti yandi vwandaka na bimvuka ya yandi nionso. Yandi zolaka ve kuzinga na yawu, yandi bikaka yawu, tii kuna yandi landilaka kaka na kubaluka. Mpe yandi kumaka na dikunzi ya mungwa samu ti yandi zolaka yinza kulutila mbote na yina yandi zolaka kutumama na ndinga ya Wanzio yina.

<sup>182</sup> Ntangu yayi beno tala bakalasi tatu. Bantu ya kukondwa lukwikilu, bantu ya Sodome, bamambeke ya dibuundu ya kati-kati, ya madidi ve, vwandaka Lot. Kasi dibuundu yina ba soolaka, yina ba bokilaka na kubasika vwandaka Abraham mpe kimvuka ya yandi. Na yina, Bawanzio yayi, wapi kisika Bawu kwizaka? Na Abraham mpe kimvuka ya yandi. Kieleka. Bawu kulumukaka, zole ya bawu kwendaka kuna, mutindu ba-évangéliste ya bilumbu yayi.

<sup>183</sup> Beto kele na ba-evangeliste ya nene yina—yina ke kwenda na dibuundu ya denomination bubu yayi. Mosi ya bantu ya kulutila nene na yinsi, yina beto zaba, kele Billy Graham. Mpe ya kieleka yandi ke mwangisa Nsangu ya mbote na bantu yina kuna, ke bokila bawu na kubasika, “Basika na Sodome.”

<sup>184</sup> Beto fwana boka ve “Basika na Sodome,” na Dibuundu yayi. Ya fwana basika, yimeni. Kana ba me bokila yawu na nzila ya Mpeve-Santu, ya me bikala Sodome, kubanda ntama. Ya kieleka. Ya me bika Sodome. Yandi ke na kuzinga awa, na nzila ya Yandi mosi, kieleka, ya kukabuka. Mpova *dibuundu* ya kieleka zola kutuba “yina ba me bokila na kubasika, ya kukabuka.” Mpe kana beno me kabwana, ya beno . . .

<sup>185</sup> “Beni basika na kati-kati ya bawu. Beni simba ve bima ya bawu ya mvindu.” Kana beni me sala yawu ve, beni kele kuna na Sodome; beni kele mambele ya dibuundu, tiya ve madidi ve. Na yina beni fwana kukabuka beni mosi, mpe kukatuka na bima

ya yinza, mpe kubasika, mpe kuzinga ya kuvedila mpe ya santu, kutambula na misiku ya Nzambi.

<sup>186</sup> Beno bambuka moyo, Bawanzio yango zole kulumukaka kuna. Ba salaka bimangu mingi ve. Ya kele kaka na kimangu mosi yina bawu salaka, ba kufwaka bantu meso ntangu bawu kwizaka na bawu.

<sup>187</sup> Mbote, ya kele kieleka yina malongi ya Ndinga ke salaka, ke kufwaka bantu meso. Mpe ba-évangéliste yayi ya nene bubu yayi, yina beto zaba, mingi ya bawu ke kwisa tala Phoenix awa. Mpe—mpe ba-evangeliste ya nene na . . . yina me kwenda na bilanga, ke sala ve bimangu mpe nyonso yankaka, kasi bawu fwaka kaka meso ya bantu ya kukondwa lukwikilu yayi, ba-Sodomite yayi, na kulongaka Ndinga, ti, “Yesu Klisto kele Mwana ya Nzambi.”

<sup>188</sup> Kasi, na yina, awa kele Dibuundu ya kimpeve; dibuundu ya yinza ve, to ya Sodome ve. Kasi Dibuundu ya kimpeve, yina ke kwikilaka na Nzambi, yina ba me talaka na Nzambi, mutindu Abraham vwandaka, nzila nyonso. Abraham kele kifwani ya kulunga ya Nkuna ya Abraham na manima ya yandi, na kati ya Dibuundu, “Bantu yina kele na kati ya Bantu ya makanda, samu na Nkumbu ya Yandi,” Nkuna ya kimfumu, mutindu mu longaka na Lumingu. Beno me mona? Ntangu yayi, Dibuundu yayi, ba me bokila Yawu na kubasika, ya kukabuka, nyonso ya yinza, kubasika, kutambula na Mpeve-Santu, mutindu Abraham salaka.

<sup>189</sup> Beto me mona mitindu nyonso ya bima, mutindu Abraham salaka, kukwiza. Kasi yinki vwandaka kidimbu yina ya nsuka yina yandi monaka na ntwala ya nsuka ya nzyetolo? Yinki vwandaka kidimbu ya nsuka na ntwala ya yina mwana ya bakala yina kotaka na kisalu? Abraham vwandaka vingila mwana. Ya kieleka? [Dibuundu me tuba, “Amen.”—Mu.] Beto kele Nkuna ya Abraham? [“Amen.”] Na yina beto ke na kuingila Mwana, Mwana ya nsilulu, Mwana ya Nzambi.

<sup>190</sup> Mpe Abraham monaka bisalu ya mansweki ya Nzambi ntangu Yandi bokilaka yandi, na kati ya mwa Nsemo yina na ntangu yina, mpe munkayulu, mpe siamisaka ngwisani na yandi. Mpe bambala mingi Yandi kutanaka na yandi na mitindu mingi ya kuswaswana. Kasi kidimbu ya nsuka yina Yandi talisaka Abraham, vwandaka ntangu Yandi kwizaka, monisamaka na nsuni, mpe vwandaka na mukongo ya Yandi ya kubaluka na tenta, mpe tubaka na Sarah.

<sup>191</sup> Abraham na ntembe ve kwikilaka ti ya vwandaka Nzambi. Bantu yankaka ke kwikilaka ve ti ya vwandaka mutindu yina. Kasi, ti, Biblia me tuba ti ya vwandaka Nzambi. Abraham tubaka ti Yawu vwandaka mutindu yina. Yandi bokilaka Yandi, “Elohim.” Elohim kele Mvangi ya nene ya mazulu mpe ntoto.

<sup>192</sup> Ntangu yayi, Yandi kumaka Yandi mosi, nsuni, samu na kidimbu, ti na bilumbu ya nsuka (Beno me mona bantu ya Sodome, muntu ya kukondwa lukwikilu? Beno me mona mambele ya dibuundu?), ntangu yayi, beno tala mbote bantu ya Kusolama, yina ba bokilaka na kubasika, mpe Yandi, na kati ya Musolami yayi, Yandi ke kukitalisa Yandi mosi na ngolo ya Mpeve-Santu, na kati ya nzutu ya muntu. Amen. Beno lenda mona ve ti ya kele Mesiya? Nzambi, Klisto, talisamaka na kati ya Dibuuundu ya Yandi; Dibuuundu ke sala Luzingu mosi, ke zinga luzingu mosi, ke sala bidimbu mosi. “Yandi yina ke kwikila na Munu, yandi mpe ke sala bisalu yina Mu ke sala.”

<sup>193</sup> Kana mpeve ya bandi vwandaka na kati ya munu, mu zolaka tula minduki na zulu ya munu. Kana mpeve ya mpasi vwandaka na kati ya munu, mu lendaka fikula foto ya kifikudi, mpe lendaka sala. Kana mpeve ya kisadi-matoma vwandaka na zulu ya munu, mu lendaka tuba na beno yina vwandaka tambula mbote ve na ditoma ya beno. Beno me mona?

<sup>194</sup> Mpe kana Mpeve ya Yesu Klisto kele na kati ya munu, mu ke sala bisalu ya Klisto, samu ti ya kele Luzingu ya Klisto na kati ya beno. Beno me mona? Kumonisama na kati ya Nani? Yina monisamaka? Yandi vwandaka . . . Bikaka Bumwana ya Yandi, mpe kumaka disumu, mpe bakaka masumu ya beto, ti Yandi lendaka baka misumuki mpe kusala bawu bana ya babakala. Yandi kumaka munu, samu ti mu kuma Yandi. Yandi kumaka musumuki, ti mu lendaka kuma mwana ya Nzambi. Yandi . . . Oh, ya—ya ke bula, yina Yandi salaka. Beno me mona? Yandi bakaka kisika ya beno, ti beno lendaka baka kisika ya Yandi. “Beno kele bilandi kintwadi na Yandi; na Kimfumu.” Yandi kumaka musumuki, mutindu beno; masumu ya beno tulamaka na zulu ya Yandi, ti Yandi lendaka baka beno mpe kusala beno mwisi-ntoto ya Mazulu, mpe kutula beno na Yandi na Kimfumu ya Nzambi. Beno bawu yayi: beno tula Mpeve ya Yandi na kati ya beno. Mpe kana Mpeve ya Yandi kele na kati ya beno, bisalu yina Yandi salaka beno ke sala mpe.

<sup>195</sup> Ntangu yayi, beno tala yina Yandi salaka ntangu Yandi vwandaka awa na zulu ya ntoto. Wapi mutindu Yandi kukitalisaka Yandi mosi?

<sup>196</sup> Beno lenda ve kukwenda kuna, kunatama kuna, mpe kukwenda na ba-salles ya billard, mpe kuvwanda ntama na dibuundu, mpe ke vwanda na yinzo na Kilumbu ya tatu na nkokila, samu na kumona mutindu mosi ya bansaka ya mvindu ya televizyo, to kima mutindu yina, mpe kubika dibuundu ya beno, mpe nyonso mutindu yina, mpe kuvingila na kumona Klisto. Beno fwana bika bima yina, samu na kulanda Mpeve-Santu.

<sup>197</sup> Bika Yandi kukitalisa Yandi mosi mutindu Mesiya, mutindu bilandi yina ya ntete salaka. Bawu landaka Yandi, samu na

kumona kana Yandi vwandaka Mesiya. Yinki beno ke banza salaka ntangu André vwandaka mpimpa nyonso na Yandi na nkokila yina, yandi mpe Philippe? Na suka yina landaka, Philippe kwendaka nzila mosi, mpe André yankaka.

<sup>198</sup> André kwendaka na manima ya mpangi ya yandi ya bakala. Mpe kaka na ntangu yandi monaka Simon, yandi tubaka, “Kwisa, tala. Beto me mona Mesiya yina.” Yandi zabaka ti Yandi vwandaka Mesiya. Samu na yinki? Yandi zabaka yina Mesiya zolaka vwanda. Yandi zabaka, Masonuku, yina Mesiya zolaka vwanda.

<sup>199</sup> Ntangu yayi, ya kieleka, ba-Juif, bilumbu yina, bawu bakulaka yawu nyonso, mabuundu yayi ya nene. “Oh, ntangu Mesiya ke kwiza, ya ke vwanda na mpungi ke bula na mazulu, mpe Nzambi ke ningisa kima mosi, mpe ke bika ba-couloir ya Mazulu kukulumuka. Mpe ya ke vwanda na Wanzio yina ke pesaka mbote na ntoto. Mpe Mesiya ke kwisa, ke tambula na ba-couloir ya mutindu yina, na Bawanzio mpe bimvuka, mpe bima ya mutindu yina, ke kulumuka na tempelo *yayi*, ke kota na kati ya yawu. Yandi ke vwanda Mesiya. Yandi ke baka nkawa, mpe ke yala ntoto.”

<sup>200</sup> Beno tala mutindu Yandi kwisaka, kasi Yandi kwisaka landila Masonuku. “Ya kuvwanda na zulu ya yintu ya mulet, me kwiza, ke tambula na Jérusalem, ya lembami mpe ya lembami.” Ya kele kieleka. Beno me mona?

<sup>201</sup> Yina balukaka mpe profete, Jean. Yandi longaka Mesiya na ba-ventilateur na diboko ya Yandi, na mutindu ya kulunga na nzila ya Yandi; mpe ntangu Yandi kwisaka, ya lembami mpe ya kukikulumusa. Kasi Jean zabaka ti yina vwandaka Mesiya, samu yandi monaka Nsemo yina na zulu ya Yandi. Mpe yandi zabaka yawu. Yandi tubaka, “Yandi yina tubaka na munu na ntoto ya kuyuma, ‘Kwenda, baka mbotika na masa,’ yandi tubaka, ‘Na zulu ya Yina beno ke mona Mpeve ke kulumuka mpe ke vwanda, Yandi kele Yandi yina ke botikaka na Mpeve-Santu mpe tiya.’” Muntu yankaka ve monaka yawu. Jean monaka yawu. Nsilulu vwandaka na Jean.

Muntu ve monaka mbwetete bantu ya ndwenga landaka.

<sup>202</sup> Mpe na yawu ya kele na nkokila yayi. Beno lenda vwanda awa, ya kufwa meso, mpe kumona ata mbala mosi ve ngolo ya Nzambi. Beno lenda bakula yawu ve tii kuna Nzambi ke zibula ya beno. . . “Nyonso yina Tata pesaka Munu ke kwiza na Munu, mpe muntu ve lenda kwiza kana Tata ya Munu me benda yandi ve.” Kaka yina. Yina ke sukisa diambu.

<sup>203</sup> Ntangu yayi beto ke mona ti bawu bikaka nyonso, mpe bawu landaka Yandi mpe monaka ti Yandi vwandaka Mesiya. André kwendaka mpe tubaka na Pierre, yandi tubaka, “Nge zaba yina tata ya beto tubaka na beto?” Kima mosi na nzila yayi, mu banza. “Beto zaba ntangu Mesiya ke kwisa, Moise tubaka na beto

ti ‘Mfumu Nzambi ya beto ke telemisa Profete’ kaka mutindu yandi. Mpe beto zaba yawu, ba longaka beto, ‘Kana ya kele na mosi na kati ya beto, yina kele ya kimpeve to profete, yina yandi ke tuba ke salama, na yina beno kuwa yandi. Kana ya salama ve, na yina beno kuwa yandi ve.’ Mpe beto zaba ti Mesiya ke vwanda . . . kaka profete ve. Yandi ke vwanda Profete-Nzambi. Na yina Bakala yayi kele Muntu yango.”

“Wapi mutindu nge me zaba, André?”

“Kwisa kaka, mona.”

<sup>204</sup> Yandi kwendaka kuna. Mpe kaka na ntangu yandi belamaka na ntwala ya Yesu, Yesu tubaka, “Nkumbu ya nge kele Simon, mpe nge kele mwana ya Jonas.” Yandi zabaka, kaka kuna, yina vwandaka Mwana ya Nzambi.

<sup>205</sup> Awa kwisaka Philippe, na Nathanaël. Kaka na ntangu Nathanael kwisaka na Yandi, yandi zabaka . . .

<sup>206</sup> Bawu fwana, mu banza, na disolo ya nene bawu kuzwaka, ba vwandaka zonzila yawu, ntangu ba vwandaka kwisa kuna. Mpe mutindu Yandi tubaka na Pierre bima yayi, mpe pesaka yandi nkumbu yankaka, mpe tubaka na yandi nani yandi vwandaka, mpe tata ya yandi, nyonso yina, samu na yawu. “Beno zaba ti Mesiya fwana vwanda profete.”

<sup>207</sup> Mbote, awa yandi me kwiza kuna, me belama na ntwala ya Yesu. Mpe Yesu tubaka, “Beno tala Israélite yina na kati ya yandi luvunu kele ve.”

Yandi tubaka, “Rabbi, wapi ntangu Nge me zaba munu?”

<sup>208</sup> Yandi tubaka, “Ntete Philippe bokila nge, ntangu nge vwandaka na yisi ya yinti, mu monaka nge.”

<sup>209</sup> Yandi tubaka, “Rabbi, Nge kele Mwana ya Nzambi. Nge kele Ntinu ya Israel.” Yina sukisaka dyambu, samu na yandi.

<sup>210</sup> Kento ya ntwenya, ya kyadi, ya nzanzi, ya mvindu, yina vwandaka zinga na babakala sambanu. Yandi kwelaka tanu, mpe yina yandi zingaka kuna vwandaka ve ya yandi. Yandi kwendaka na dibulu ya masa kilumbu mosi samu na kubaka masa. Mpe ntangu yandi yambulaka pompe, to kantini na kati ya kitekuni, na yisi, samu na kubaka masa, mpe ntangu yandi bandaka na yawu, yandi monaka Bakala mosi ya bamvula ya kati-kati yina vwandaka kuna, Juif. Yandi tubaka, “Kento, natina Munu maza ya kunwa.”

<sup>211</sup> Yandi tubaka, “Beto kele na nkabwani. Ya kele ve—ve . . . ya kele ve na kikalulu awa samu na Nge, na kuvwandaka Juif, samu na kulomba munu, kento ya Samarie, samu na kima ya mutindu yina. Beto ke na ngwisani ve.”

<sup>212</sup> Yandi tubaka, “Kasi kana beno zabaka Nani vwandaka zonza na nge, nge zolaka lomba Munu maza. Nge zolaka lomba Munu maza.” Bawu kaka . . . Bawu landilaka, na kuzonzaka mosi

na yankaka, mwa ntangu fyoti. Yinki Yandi vwandaka sala? Yandi vwandaka meka na kutala kisika vwandaka mpasi ya yandi.

Ntangu yayi, “Yesu vwandaka na nsatu ya kuluta na nzila ya Samarie.”

<sup>213</sup> Beno bambuka moyo, Yandi kukitalisaka kaka Yandi mosi na ba-Juif mpe Bantu ya makanda. . . Ya kele Cham, bantu ya Sem. Beno me mona? Bantu ya Japhet bikanaka. Beto ba-Anglo-Saxon, beto vwandaka mimpani, na kusambilaka biteki na bilumbu yango. Beno bambuka moyo. Samu na yinki Yandi monisaka ve Yandi mosi, Yesu, ntangu Yandi vwandaka na zulu ya ntoto, na Bantu ya makanda, na kidimbu mosi yina, samu na kulakisa bawu? Samu ti Bantu ya makanda vwandaka vingila ve Mesiya.

<sup>214</sup> Ba-Juif vwandaka vingila Mesiya, mpe ba-Samaritain vwandaka vingila Mesiya.

<sup>215</sup> Mpe Yandi monisamaka Yandi mosi mutindu Mesiya, na kutubaka na Pierre, yandi yina Yandi pesaka bafungula na Kimfumu. Mpe na Nathanael. Mpe Bartimée, ntangu lukwikilu ya yandi kangaka Yandi. Mpe kento yina vwandaka basika menga. Mpe nionso yina, samu na ba-Juif.

<sup>216</sup> Kasi awa Yandi kele na ntwala ya ba-Samaritain, mpe Yandi kwisaka na ba-Samaritain, samu na kukitalisa Yandi mosi mutindu Mesiya ya kieleka.

<sup>217</sup> Ntangu yayi, bankama ya bamvula, ba-Juif mpe ba-Samaritain kwikilaka ti Mesiya vwandaka kwisa. Na yawu, kana Mesiya vwandaka na zulu ya ntoto, ya me tala Mesiya samu na kukitalisa Yandi mosi.

<sup>218</sup> Beno tala kiboba Siméon na tempelo, na kimbangi, ti, “Mu ke mona ve lufwa tii mu ke mona Klisto.” Mpe kaka na ntangu yina Marie nataka Bébé kuna, Mpeve-Santu tubaka na Siméon. Yandi kwendaka tii kisika Yandi vwandaka, mutindu *yayi*, mpe telemisaka maboko ya yandi, mpe tubaka, “Bika kisadi ya Nge kukwenda na ngemba landila Bandinga ya Nge, samu meso ya munu ke mona Mpulusu ya Nge.” Siméon zolaka zinga mingi ve samu na kumona Yandi lungisa bisalu ya Yandi ya Bumesiya, kasi yandi vwandaka na kimbangi ti Yandi vwandaka.

<sup>219</sup> Kasi Yandi kukitalisaka Yandi mosi na bantu, mutindu Mesiya, samu na kuvwanda Nzambi-Profete yina. Kento yina, ntangu Yandi tubaka na yandi, yandi tubaka, “Kwenda, baka bakala ya nge mpe kwisa awa.”

Yandi tubaka, “Mu ke na bakala ve.”

<sup>220</sup> Yandi tubaka, “Nge me tuba mbote. Nge vwandaka na tanu, mpe yina nge ke na kuzinga na yandi ntangu yayi kele ve bakala ya nge.”



221 Yandi tubaka, “Tata, mu ke mona ti Nge kele profete. Beto zaba, ntangu Mesiya ke kwisa, Yandi ke tuba na beto bima yayi. Yayi ke vwanda kidimbu ya Mesiya ntangu Yandi ke kwisa. Yandi ke vwanda Yandi yina ke tuba na beto bima yayi.”

Mpe Yesu tubaka, “Mu kele Yandi yina ke zonzaka na nge.”

222 Na nswalu yandi bikaka dibungu yina mpe kwendaka mbangu na kati ya mbanza, mpe tubaka na bantu na kati ya mbanza, “Beno kwiza, beno tala Muntu mosi, Yina tubaka na munu yina mu salaka. Yayi kele Mesiya ve ya kieleka? Ya kele ve kidimbu ti Mesiya zolaka lakisa beto?”

223 Yandi ata mbala mosi dyaka ve salaka yawu, ntete mosi ya bawu, kasi bawu tubaka bantu ya mbanza yina kwikilaka Yandi samu na kimbangi ya kento yina Yandi vwandaka Mesiya. Amen.

224 Ntangu yayi ya kele ntangu ya Bantu ya makanda. Beto me kuzwa bamvula mafunda zole ya bakusala, bakumata mpe bakukulumuka, ba-organisation, bi-mpe-kubasika, mpe kuswana mpe bambendumuka, mpe kuswana mpe kunwana, mpe bima yankaka nionso, ba-théologien mpe ba-seminere, mpe nionso yankaka.

225 Ntangu yayi, kana Yandi bika ba-Samaritain yayi mpe ba-Juif yina kukwisa, yina bikaka banzambi ya yinza, samu na kusadila Nzambi, mpe sosaka nkwizulu ya Mesiya, mpe Mesiya kukitalisaka Yandi mosi na ba-Juif mutindu yina, na kilumbu yina . . . Mpe Yandi lenda ve kubuka misiku ya Yandi. Yandi kele ve Tata yina ke sala mosi na mosi, mpe mosi na kima yankaka, kima yankaka. Yandi kele Yesu mosi. Kieleka.

226 Ntangu yayi, awa, beto me kuzwa bamvula mafunda zole. Mpeve-Santu me kubwa na zulu ya beto. Beto zonzaka na bandinga, mpe monaka bidimbu mpe mambu ya ngitukulu, mpe nionso yina. Ntangu yayi, kidimbu ya nsuka yina Abraham monaka, ntete mwana ya nsilulu kuvutuka, vwandaka Nzambi ke kukimonisa Yandi mosi na kati ya nzutu yina lendaka kudia, na kuzabisaka na ntwala mpe talisaka kidimbu mosi yina Yesu talisaka ntangu Yandi vwandaka awa, samu na kuvwanda Mesiya. Ntangu yayi, Yesu pesaka profesi mpe tubaka ti ya ke vwanda mutindu yina. Mpe, bankundi, ntangu yayi ya kele ngunga.

227 Ba-Juif yango ya kutelama kuna, ntangu bawu monaka Yesu kutuba yawu na muntu yina, bawu tubaka . . . Bawu zolaka pesa mvutu na dibuundu ya bawu. Bawu, bawu zabaka ti yawu salamaka, na yina bawu lendaka sala kima mosi ve samu na yawu. Bawu zolaka pesa mvutu na dibuundu ya bawu, na yawu bawu tubaka, “Muntu yayi kele Béélzébül. Yandi . . .” Bawu banzaka ti na kati ya ntima ya bawu. “Muntu yayi kele Béélzébül, beno me mona, samu ti Yandi kele nganga-nkisi, mutindu mosi ya bantu ke tangaka mabanza, to kima mosi. Yandi kele Béélzébül.”

228 Yesu zabaka mabanza ya bawu. Mpe Yandi balukaka na bawu, mpe Yandi tubaka, “Nge ke zonza yawu na kuteleminaka Munu, Mwana ya muntu, Mu ke lemvokila nge. Kasi, na mutindu yankaka, kilumbu mosi Mpeve-Santu ke kwisa, samu na kusala kima mutindu mosi. Mpe samu na kutelemina Yawu, ya kele ata mbala mosi ve na yinza yayi to na yinza yina ke kwiza.”

229 Oh, mpangi-bakala, mu kele na kyese mingi na nkokila yayi na kuzwa lusakumunu ya pantekote. Amen. Kukondwa ntembe kasi na kati awa, bampangi, beno kele ya kuvwanda awa na Dibuuundu ya Nzambi, Carré, ba-Assemblée ya Nzambi, mpe bayankaka nionso. Ya kele mbote mingi. Ti, beno landila kaka na kukwenda. Ve. . . Beno vwanda kaka kaka na yawu. Beno me mona? Kasi beno banza ata mbala mosi ve ti bulanketi ke tandama ve na zulu ya mpangi ya beno yankaka, mpe, na organisation yankaka yina kele (kaka mutindu) kuzwa Mpeve-Santu. “Nzambi pesaka bawu Mpeve-Santu yina tumamaka na Yandi.” Na yawu mpangi-bakala yankaka salaka, mpe, beno me mona, ya vwandaka balula kaka yawu. Ya kele mbote mingi. Mpe beto vukana kintwadi mpe beto sepela.

230 Beto me bika yinza. Beto kele Nkuna ya Abraham. Beto kele Nkuna ya Klisto, Nkuna ya nsilulu. Mpe beto me kuma kisika yango, kuna. Mpe yinki vwandaka kima ya nsuka ntangu yayi, ti Yandi pesaka tata ya beto Abraham? Kidimbu yina, na ntwala ya Sodome, na ntwala ya kuyokama, mpe nkwizulu ya mwana. Ntangu yayi, kaka na ntwala ya kwizulu ya Mwana ya nsilulu, mpe kuyokama ya Sodome, Nzambi silaka na nzila ya Yesu Klisto ti ya ke vwanda kieleka, “Mutindu ya vwandaka na bilumbu ya Sodome.”

231 Beno tala na yinza bubu yayi. Disolo ya yinza me monaka ata fioti ve mambu mingi ya kubeba mutindu beto ke na yawu bubu yayi. Mpe mikanda ya munu me fuluka na bamama, ke dila, kubanda awa na Californie. Kutanga zulunale, kubeba yina, na yina, yawu sobaka na Californie, Mu banza, pene ya makumi tatu na zulu ya nkama mosi, na zulu ya mvula na ntwala. Kubeba, ya kele bisika nionso, mvindu. Balukolo, balukolo ya misambidi, fwana basisa bantu na ngaanda ya balukolo ya bawu, kele na ntangu mosi ya mpasi na mantwala. Kubeba, “na kusobaka kieleka yinza,” kaka mutindu ya vwandaka na Sodome, beto ke mona yawu mutindu yina.

232 Beno tala Billy Graham, munati-nsangu ya Nzambi, kuna na kati, ke kombola Nsangu ya mbote yina.

233 Ntangu yayi, yinki samu na Dibuuundu, Musolami? Ya zolaka vwanda na kidimbu, mpe. Ya kele kieleka ve? Ya zolaka kuzwa yawu. Mu ke tula kivuvu na nkokila yayi ti beto ke bika kukondwa lukwikilu ya beto nionso, mpe ke kwikila na Mfumu Yesu, mpe ke landa Yandi, mpe kumona bidimbu ya Yandi ya kilumbu ya nsuka, samu ti Yandi silaka ti ya ke vwanda awa.

Beto kulumusa bayintu ya beto.

<sup>234</sup> Ya kele na mosi awa na nkokila yayi yina zaba Yandi ve mutindu Mvulusi ya beno, mpe beno ke zola kubika nyonso kaka ntangu yayi mpe kulanda Yandi? Beno zola kaka kutelemisa diboko ya beno, kutuba, “Sambila samu na munu, Mpangi Branham. Mu ke zola kusala yawu, kuvwanda Muklisto ya kieleka.” Nzambi sakumuna nge. Ya kele na yankaka? Nzambi sakumuna nge. Nzambi sakumuna nge. Nzambi sakumuna nge, mpangi-kento. Nzambi sakumuna nge, mpe nge, mpangi-bakala. Yankaka? Nzambi sakumuna nge, tata. “Mu ke zola kubika nyonso. Mu—mu ke sala yawu, Mpangi Branham.”

<sup>235</sup> Mu zola kuyufula kima mosi. Mpangi-bakala, mpangi-kento, mu—mu zola ve—mu zola ve kunyongisa muntu mosi. Kasi, beno me mona, beno—beno—beno. . . Beno kele na kizitu ya Ndinga. “Kana—kana beno ke vwanda na kati ya Munu, mpe Bandinga ya Munu ke vwanda na kati ya beno.” Bantangu yankaka mu fwana tuba bima yina ke zengaka munu, mingi-mingi na bampangi ya munu ya bakento.

<sup>236</sup> Samu ti, beno me bakula ti kento vwandaka yina Satana sadilaka na mbandukulu. Nzambi soolaka bakala. Satana soolaka kento.

<sup>237</sup> Yandi vwandaka ya kusakumuka, ya kieleka, samu na kuvwanda kibumbulu yina nataka Yesu Klisto na ntoto. Ntangu yayi, Yina vwandaka ve Mwana ya yandi. Beno nionso zaba yawu. Yesu ata mbala mosi ve bokilaka mama ya yandi. Ata mbala mosi ve ti yandi kuzwaka. . . Ya kele kimvuka ya bantu, kasi beno kuwa munu. Ya vwandaka ve na sperme yina katukaka na Marie. Yawu nionso salamaka, mwense, na nzila ya Nzambi. “Mpeve-Santu fikaka yawu na kivudi.” Ya kele samu na yina Yesu zolaka bokila ve mama ya yandi. Yandi vwandaka ve kitini ya yandi, kima mosi ve. Yandi vwandaka kaka kibumbulu yina Nzambi sadilaka, samu na kunata Bébé.

<sup>238</sup> Samu ti, kana ya vwandaka na kima mosi ya kento yina vwandaka ya Mwana-bakala yina, Bébé yina, kento yina (beno me bakula; beno bakuluntu zaba yina mu zola kutuba), ya zolaka vwanda na mutindu mosi ya dibanza, mutindu mosi ya sperme katukaka na kento yina, na nzila ya yawu, kuna ya vwandaka kieleka mutindu kisalu ya kuvukisa banzutu na Nzambi ya Ngolo nyonso. Ya zolaka vwanda ve.

<sup>239</sup> Nzambi vangaka bébé, diki na Menga. Cellule nionso zole, ya kento mpe bakala, Nzambi vangaka. Ya kele samu na yina nzutu yango vumbukaka. Kieleka. Yandi vwandaka ya ntete ya mvumbukulu. Na yina Yandi bokilaka mama ya yandi ata fioti ve. Ba tubaka, “Mama ya nge kele awa ke vingila Nge.”

<sup>240</sup> Yandi tubaka, “Nani kele mama ya Munu?” Yandi tubaka, “Bayina ke sala luzolo ya Tata ya Munu, mutindu mosi kele mama ya Munu.” Beno me mona? Na yawu Yandi ata mbala mosi

ve bokilaka mama ya yandi. Yandi bokilaka yandi “kento.” Ya kele yina yandi vwandaka.

<sup>241</sup> Mpe bayankaka ya beno bantu ya Katolika ya luzolo ke salaka yandi nzambi, to nzambi ya kento, ntinu ya kento ya Mazulu. Ya kele kieleka ve. Ve, ya kele ve. Yandi vwandaka kento ya mbote. Yinga, tata. Kieleka. Kasi yandi vwandaka ve kulutila kento yankaka yina Nzambi soolaka samu na kusadila. Yandi lenda sadila kento mosi samu na kima yankaka. Yandi lenda sadila yandi, na mutindu nionso. Yandi vwandaka kaka kibumbulu, samu ti ya kele yina yandi vwandaka, samu na kubumba Nkuna tiya, mpe nionso yina mutindu yina. Mpe Luzingu kwisaka na kati ya Bébé. Kasi Menga, hemoglobine, beto ke zabaka ntangu nionso, katukaka na sexe ya bakala. Mpe Yandi vwandaka bakala, Mvangi. Yandi vwandaka Juif ve. . . Bébé vwandaka. . .

<sup>242</sup> Yesu vwandaka ve Juif to Muntu ya makanda. Yandi vwandaka Nzambi. Ya kele kieleka. Nzambi Yandi mosi vangaka nzutu yina Yandi zingaka. Yina vwandaka Mwana ya Yandi, Yesu Klisto. Mbutukulu yina ya santu, ya bumwense pesaka muntu yayi, kivumu ya bumwense na nzila ya Mpeve-Santu. Kento vwandaka ve na kima ya kusala na yawu, to diki to cellule ya menga.

<sup>243</sup> Bakala kele na cellule ya menga. Kento kele na diki. Na mutindu yayi, ya fwana vwanda na mutindu mosi ya nsatu mpe dibanza, samu na kusala kima kusalama.

<sup>244</sup> Mpe na dyambu yango, ya vwandaka na kima ve kasi kifwani ya Mpeve-Santu, mpe Nzambi vangaka na kento. Yina kele Mvulusi ya munu. Kukondwa Yandi, beto nionso me kwenda.

<sup>245</sup> Ntangu yayi, bayankaka na kati ya beno awa, beno bakento, beno, mu banza bakento ya Pentecote, vwandaka ya kubwa na kulwataka bilele ya mansoni, na kuzengaka bansuki ya beno, na kusalaka bima. Mu ke tala awa na Californie, ya kele ve na mingi ya bawu. . .

<sup>246</sup> To, awa na Arizona, mu zola tuba, mingi ve ya bawu ke na kupakula. Yina ba me nwanaka samu na bawu, mpe. Mbote, ya kele ve na kima na kati ya Biblia samu na kutuba na beno na kupakula ve. Beto zaba kaka ti ya kele luvunu, samu ti ya kele ya yinza.

<sup>247</sup> Kasi ya kele na lutumu na kati ya Biblia ti kento, ke zenga nsuki ya yandi, kele muntu ya kukondwa buzitu. Mpe kana ya ke monana mutindu yina na Nzambi, mpe beno ke tuba ti beno kele na Mpeve-Santu, mpe ke sala mutindu yina, kima mosi ke tambula mbote ve.

<sup>248</sup> “Kulwata lele yina kele ya bakala.” Oh, mpangi-kento, ya luzolo, beno landa ve yinza. Beno bika yinza. Beno kangama na Klisto.

Beno ke tuba, “Wapi luswaswanu ya ke sala?”

249 “Kyese na yandi yina ke salaka misiku ya Yandi nyonso, ti yandi fwana kuzwa muswa ya kukota na Yinti ya Luzingu.” “Ya kuzaba dyambu ya fyoti kele ya kuzaba dyambu ya muvimba.”

250 Beno zaba ya kulutila mbote. Kana beno kele na Mpeve-Santu, ya kieleka ya ke tuba na beno mbote. Ya ke tuba na beno mbote, kana ya kele Mpeve-Santu.

251 Ntangu yayi, kana beno kele ya kubwa, mpe ke zola kusala kubanda na nkokila yayi, mpe kutuba, “Mpangi Branham, mu bakulaka yawu ve. Mu kotaka na malembe. Mu zola kubanda ya malu-malu. Kubanda yayi, mu ke sadila Nzambi.” Telemisa diboko ya nge, tuba, “Sambila samu na munu, Mpangi Branham.” Nzambi sakumuna nge. Yina ke lomba nerf. Ya ke lomba kieleka. . . Nzambi sakumuna nge. Maboko mingi. Mbote mingi. Nzambi sakumuna nge. Na yina, kana beno zaba, ti Kima mosi na kati ya beno, ke tuba na beno ti beno kele na foti, na yina beno zaba ti Nzambi kele pene-pene ya beno.

252 Kasi ntangu beno ke kuwa Ndinga pwelele, mpe kuna beno ke vwanda kaka kuna mpe ke tuba, “Mu ke sala yawu ve. Yandi zaba ve yina yandi ke na kutuba,” mpe mu ke na kutanga kaka Ndinga awa, beno me mona, na yina ya kele na kima ke tambula mbote ve na yina kele na kati ya beno. Beno me mona? Ya kele ve kasi kima mosi, kele Satana. Kaka yina. Ya ke telemina Nzambi. Ya ke telemina misiku ya Yandi. Ya ke telemina Ndinga ya Yandi.

253 Muntu mosi tubaka na munu, ntama mingi ve, mulongi mosi ya lukumu. Yandi tubaka, “Mpangi Branham.” Yandi bokilaka munu na kivinga ya yandi, yandi tentikaka maboko na zulu ya munu. Yandi tubaka, “Nge ke bebisa ministere ya nge.”

Mu tubaka, “Yinki?”

254 Yandi tubaka, “Nge ke nganina ntangu nionso bantu, samu na mutindu bawu ke salaka.” Yandi tubaka, “Samu na yinki nge ve. . . bantu ke banza ti nge kele profete.”

Mu tubaka, “Mu kele profete ve.”

255 Yandi tubaka, “Mbote, bantu ke banzaka ti nge kele yawu. Samu na yinki nge ke longaka ve bima yayi ya kimpeve, wapi mutindu bawu lenda kuzwa balusakumunu ya nene ya kimpeve mpe nyonso?”

256 Mu tubaka, “Wapi mutindu mu lenda longa bima ya kimpeve na yina bawu zaba ve ABC ya bawu? Ba ke vwanda ve na bumuntu ya fioti samu na kusungama na Ndinga, beno bika kaka bima ya kimpeve. Kana bawu ke kwikila ve bima ya ntoto, wapi mutindu bawu ke kwikila bima ya mazulu?”

Yandi tubaka, “Mbote, nge ke bebisa kaka ministere ya nge.”

257 Mu tubaka, “Ministere nionso yina Ndinga ya Nzambi ke bebisa, yawu ke beba.” Beno vutuka na Ndinga. Ya kieleka.

258 Ntangu yayi, kana beno ke kunwa makaya, mpe nionso yina, mpe beno ke tuba ti beno kele na Mpeve-Santu, nsoni na beno. Beno babakala! Beno ke tuba, “Samu na yinki nge ke nganina bakento?” Beno babakala yina ke bika bakento ya beno kusala yawu, oh, tata, beno ke kukibokila beno mosi Muklisto, nsoni na beno.

259 Mu zaba ti yayi kele mpasi. Kasi, mpangi-bakala, ya kele—ya kele ntangu ya mbote. Ya kele ntangu samu na Mpeve-Santu na kukwiza, kubaka Kento ya Yandi ya makwela. Mpe kana ya kele ve nzila na Ndinga ya Yandi, na yina ya kele na kima ke tambula mbote ve.

260 Beno bayina kubwaka, beno vwanda na yinzo na Kilumbu ya tatu na nkokila mpe ke kwiza ve awa na dibuundu, ba ke talaka ba-television, mpe bampimpa yankaka ya dibuundu! Beno banza, kieleka beno—beno ke tuba, mpe kana beno fwana kwiza na dibuundu, beno fwana tuma beno mosi na kusala yawu, samu ti beno banza ti ya kele musiku beno ke salaka yawu. Beno fwana sala yawu. Ya kele lukumu na kusala yawu. Mpe kana beno zola ve kusala yawu, ya kele na kima mosi ke tambula mbote ve. Ya kele na Mpeve-Santu yina ke sala beno kuzola kusadila Nzambi.

261 Ntangu yayi, na yina, na yina bayintu ya beno kele ya kukulumusa, bayina nionso ke kuwa ti ba ke zola kusala kubanda na Nzambi, na nkokila yayi, beno telemisa diboko ya beno. Kaka muntu nyonso na kati awa ntangu yayi, beno telemisa kaka diboko ya beno, muntu nyonso, bisika nyonso. Nzambi sakumuna nge, sakumuna nge, nge, nge, nge. Nzambi sakumuna nge. Mbote. Mu ke sambila samu na nge.

262 Tata ya Mazulu, ntangu yayi mu me zonza Bandinga ya Nge pwelele mpe mbote-mbote, mpe na kuzengaka, mutindu mu me zaba. Ve samu na kuvwanda ya kuswaswana; kana yina ke vwanda dibanza ya munu, Mfumu, mu fwana vwanda mosi na zulu ya autel. Kasi kana mu mona muntu mosi, mpangi ya munu ya bakala to ya kento, ke dinda na masuwa ya ntama, mpe mu ke nganina bawu ve, to mu ke semba bawu ve, to mu ke basisa bawu na kondisyo yina ve, na yina mu ke zolaka bawu ve. Mu ke meka na kubasisa bawu, Mfumu, samu ti bawu vwanda na lukengolo.

263 O Nzambi ya Mazulu, mu ke sambila samu na mosi na mosi yina me telemisa maboko ya bawu. Mu monaka bakento mingi ya bansuki yina ya kuzenga ke telemisa maboko ya bawu, na lemvo mingi samu na bawu tii bawu zaba ti bawu kele na foti. Ya vwandaka na mingi yina salaka ve. Ntangu yayi, Nge kele Zuzi ya yawu. Kasi mu ke sambila, Nzambi, ti Nge ke vulusa bayina. Pesa yawu. Ntangu nionso. . .

264 Babakala yango telemisaka diboko ya bawu, bantwenya ya babakala ya kitoko ya kuvwanda na bakento ya bawu, mpe nyonso yina, me telemisa diboko ya bawu. Biboba ya bantu me

telemisa maboko ya bawu. Ntangu yayi, Tata, beto fwana bika yinza mpe bima ya yinza, to beto lenda sadila Nge ve.

<sup>265</sup> Mu ke sambila ti Nge ke kukitalisa Nge mosi na nkokila yayi na mutindu yina ti bantu ke mona, ti, Ndinga yina ba zonzaka. Bantu lenda tuba kima mosi. Kasi ntangu Nzambi ke kwiza mpe ke siamisa Ndinga ya Yandi, ke siamisa ti ya kele Ndinga ya Yandi, na yina beto kele kuna me bikana kukondwa esikize. Mu ke sambila, Tata, ti Nge ke pesa yawu na nkokila yayi. Mpe kaka na ntangu bantu yayi. . .

<sup>266</sup> Mu banza ti mingi ya bawu kele misumuki. Mingi me telemisa maboko ya bawu, mutindu misumuki. Mpe mu ke sambila, Tata, kaka na ntangu bawu ke mona kumonisama. . . Mpe mu ke tula kivuvu ti Nge ke sala yawu na nkokila yayi, ke kukitalisa Nge mosi, ti nsuka kele awa. Kuvingila ya Mwana ke kuma ntama mingi ve na Nkuna ya Abraham, mpe Sodome yina ke yokama na tiya.

<sup>267</sup> Kilumbu mosi ya ke vwanda ve na ditadi mosi ke bikala na zulu ya yankaka, ya Phoenix. Kiwanda ke vwanda ya kuvedila. Na kati ya mbanza na nkokila yayi kisika pité, balukutakanu ya kunwa malafu, bamama yina ke kunwaka tabaka, bana ya bakento, ke na kubina, ke na kudenda, ba ke na kulandila, babakala yina ke na kuzingaka luzingu ya mansoni, disumu ya mbanza! O Nzambi, kasi mu ke tala yawu, mpe mu ke banza, “Yinki kele mfunu ya kumeka?”

<sup>268</sup> Kasi na yina mu ke tala kuna mpe mu ke mona mwa Nsemo *awa* mpe *kuna*, Muklisto ya busantu, ke sambila. “Bayina nionso ke na kudila mpe ke dila samu na busafu yina me salama na kati-kati ya mbanza, ba tumaka Wanzio na kutula Kidimbu na zulu ya bawu, tula bawu kidimbu, mpe bawu vwandaka yandi yina zolaka beba ve.” Mpe mu ke sambila, Tata, ya ke vwanda na mingi yina ke vwanda Muklisto ya busantu, mutindu mosi munu, mu ke na boma ve ya kunganina yimbi. Nzambi, na kilumbu yayi, beto tuba mambu yina kele mbote.

<sup>269</sup> Mpe ya ke vwanda na Kilumbu ya Lufundusu ke kwiza, mpe kuna ba ke vwanda kukondwa esikize, samu na Nsangu yayi na nkokila yayi ba ke losa yawu na kitala-tala, ba-reservatoire ya zulu, mpe beto nyonso ke pesa mvutu. Na yawu mu ke sambila, Tata, ti Nge ke vedisa bantima ya bawu na bima nyonso ya yinza, ti bawu lendaka zinga na busantu na yinza ya ntangu yayi. Beto me lombamba yawu na Nkumbu ya Yesu. Amen.

<sup>270</sup> Na yina beno lemvokila munu samu na kusimba beno ntangu mingi. Beto. . . Mu me—mu me kuma ntama mingi ve. Mpe mu—mu ve. . . Mu fwana basika. Ya nsuka. . . Konso nkokila, mu basikaka, pene ya ngunga kumi, na nsuka. Mu zolaka basika na nkokila yayi na ngunga ya yivwa na ndambu. Mu salaka yawu ve.

Ntangu yayi, beno vingila fioti, samu na kutula kidimbu na yina mu me tuba.

<sup>271</sup> Ntangu yayi, ya kieleka, mu kele mulongi ve. Muntu nyonso zaba yawu. Mu me longukaka ve, mpe mu ke sadilaka bampova ya munu ya ntama ya Kentucky ya “yandi,” “hain’t,” mpe “tote,” mpe “fetch,” mpe “carry,” mpe “thar yayi.” Mpe beno zaba ti mu kele ve mulongi mutindu yina. Mu me longukaka ve na kuvwanda.

<sup>272</sup> Kasi mu kele Muklisto. Mfumu Yesu vulusaka munu na disumu. Mu zaba yawu. Mpe Yandi pesaka munu Ndinga yankaka samu na kusiamisa yina mu zaba. Kima mosi kaka, mu ke mekaka ve na kutula ntendulu ya muntu yandi mosi. Mu ke tangaka kaka Yawu. Mpe nyonso yina Yawu ke tuba, mu ke tuba kima mutindu mosi. Beno me mona? Kaka yina mu zaba. Beno me mona? Ntangu yayi, kana ba me tendula yawu yimbi, mu zaba ve. Mu ke tuba kaka yawu mutindu ba me tendulaka yawu *awa*. Beno me mona? Mpe Yandi ke kangamaka ntangu nionso na manima ya yawu, mpe ke vutula yawu na manima.

<sup>273</sup> Mu ke kwikila ti Yesu Klisto ke kwisa ntama mingi ve. Mu ke kwikila ti Yandi kele Yesu mosi, mazono, bubu yayi, mpe kukonda nsuka. Mu ke kwikila ti Yandi tubaka, “Na mwa ntangu fioti, mpe yinza,” kosmos, ntumunu ya yinza, “ke mona beto ve. . . ke mona Munu diaka ve. Kasi, beno ke mona Munu, beno, Dibuundu, samu na munu,” kiyingilu ya muntu, “Mu ke vwanda na beno, ata mpe na kati ya beno, tii na nsuka ya yinza. Bisalu yina Mu ke sala beno mpe ke sala yawu.” Beno ke kwikila yawu? Beto me mona yina bisalu Yandi salaka, mutindu Yandi kukitalisaka Yandi mosi.

<sup>274</sup> Mu ke sambila, na nkokila yayi, ti Nzambi ke baka dibuundu yayi. . . Ntangu yayi, ata mutindu Yandi ke pakula munu, Yandi fwana kupakula beno, mpe. Beno me mona? Ata wapi mutindu Mpeve-Santu ke meka na kutuba *awa*, Ya fwana vwanda na kima mosi *kuna*, samu na kuwa yawu.

<sup>275</sup> Yesu lutaka na kati ya kimvuka ya bantu, kilumbu mosi, mpe ba vwandaka boka, “Rabbi, Rabbi, mu ke na kiese na kuvwanda na nge *awa*, *kingandi*.” Yesu kwendaka kaka.

<sup>276</sup> Mpe ya vwandaka na mwa kento mosi yina kwisaka mpe simbaka nsongi ya lele ya Yandi, mpe vutukaka mpe kulumukaka. Yesu telemaka mpe tubaka, “Nani me simba Munu?”

<sup>277</sup> Na yina, Simon Pierre tubaka na Yandi, mutindu kana, mbote, yandi sembaka Yandi. Yandi tubaka, “Mbote, samu na yinki Nge ke tuba kima mutindu yina? Muntu nionso ke simba Nge.”

<sup>278</sup> Yandi tubaka, “Kasi mu ke mona ti mu me lemba. Ngolo,” yina kele ngolo, “me kwenda ntama na Munu.”



279 Yandi talaka bisika nionso na kati ya kivinga. Ya vwandaka na muntu yina kwikilaka Yandi. Ata ti, ya lendaka vwanda na bankama kuna, kasi ya vwandaka na muntu yina kwikilaka. Yandi monaka mwa kento yina, tubaka na yandi ti kubasika ya menga ya yandi, sukaka, mpe yandi belukaka. Ya kele kieleka? Landila kaka. Beno me mona? Yandi kele mutindu mosi mazono, bubu yayi, mpe kukonda nsuka.

280 Ntangu yayi, beto kele na bakalati ya bisambu yina ba me kabula. Beto me kabula ndambu ya yawu, kuna mazono na nkokila, ndambu ya yawu na nkokila yayi.

281 Beto bandaka na ntete, mazono na nkokila? Beto bandaka na kilumbu ya ntete kumi na tanu to makumi zole, mazono na nkokila, kubanda na mosi tii na *yayi-mpe-yayi*? Yinki ya kele? Yinki nge ke tuba? [Mpangi-bakala mosi me tuba, “Makumi zole.”—Mu.] Mosi na makumi zole. Mbote mingi. Mingi ya bawu kele awa na nkokila yayi.

282 Beto pesa ndambu na manima ya yawu, kuna. Beto banda. Beto tala. Beto kele na baminuti kumi na tanu, beto pesa bakalati kumi na tanu, na yina. Beto mona, ya ke vwanda na bamvula makumi nana na tanu na nkama mosi. Beto banda na makumi nana na tanu, tii na nkama mosi.

283 Nani kele na kalati ya bisambu makumi nana na tanu? Beno telemisa diboko ya beno. Makumi nana na tanu, kento yina kuna na manima? Kwisa awa, mpangi-kento. Makumi nana na sambanu, nani kele na makumi nana na sambanu? Kaka awa. Makumi nana na sambwadi, makumi nana na sambwadi. Muntu mosi me telemisa diboko ya nge, makumi nana na sambwadi. Muntu yayi, makumi nana na sambwadi. Makumi nana na nana, makumi nana na nana. Makumi nana na yivwa, makumi nana na yivwa. Makumi yivwa, makumi yivwa na mosi, makumi yivwa na zole, makumi yivwa na tatu, makumi yivwa na yiya, makumi yivwa na tanu, makumi yivwa na tanu. Yinga. Makumi yivwa na sambanu, makumi yivwa na sambwadi. Makumi yivwa na sambanu, mu monaka yawu ve kutelama, makumi yivwa na sambanu. Ntangu yayi, kana beno kele na kalati ya beno, beno kwisa. Beno me mona? Makumi yivwa na sambwadi, makumi yivwa na nana, makumi yivwa na yivwa, nkama mosi. Mbote mingi. Na yina bantu yayi. . . Mosi, zole, tatu, yiya, tanu, sambanu, sambwadi, nana, yivwa. Ya kele pene ya nana yina ke kondwa.

284 Ntangu yayi beno kuwa. Ya kele kieleka. Beno kwisa awa ve na disumu na zulu ya luzingu ya beno. Beno ke sala mbote na kufunguna yawu kuna, na Nzambi. Kasi kana—kana beno kele, kana beno me funguna disumu ya beno, beno kwisa na ntwala.

285 Bantu yikwa kuna kele ve na kalati ya bisambu, mpe beno zola Yesu kubelusa beno? Beno telemisa diboko ya beno. Bantu

yikwa ke kwikila, kana Yesu Klisto ke sala . . . Kana Yandi . . . Bantu yikwa ke kwikila yayi?

<sup>286</sup> Beno tala mbote. Mu ke yufula milongi yayi na manima ya munu. Bampangi, ya kele kieleka, mutindu milongi ya Nsangu ya mbote, beto ke kwikila ti Biblia, Ngwisani ya Malu-malu, Buku ya ba-Hébreux, ke tuba ti Yandi kele Nganga-Nzambi ya Ntete, kaka ntangu yayi, nganga-Nzambi ya Mbuta yina lunga simbama na bansatu ya bimbevo na beto? Ya kieleka, bampangi?

<sup>287</sup> Bantu yikwa kuna zaba ti Biblia ke tuba yawu? “Nganga-Nzambi ya Ntete.”

<sup>288</sup> Mbote, kana Yandi kele Nganga-Nzambi ya Ntete yina lenda simbama na bansatu ya bimbevo ya beto, ntangu yayi, wapi mutindu Yandi salaka, kana Yandi kele mutindu mosi mazono, bubu yayi, mpe kukonda nsuka, na yina, wapi mutindu Yandi salaka ntangu muntu mosi simbaka Yandi na nsatu ya bimbevo ya bawu? Mwa kento yina vwandaka basika menga, yina simbaka Yandi, samu yandi vwandaka na nsatu ya kusimba yandi; Yandi balukaka, mpe talaka na nziunga tii kuna Yandi monaka yandi, bokilaka yandi. Ya kele kieleka? Ya kele kieleka, bampangi? Ntangu yayi, kana Yandi kele Nganga-Nzambi mosi ya Ntete, Yandi fwana sala na mutindu mosi, samu ti Yandi kele—Yandi kele Nganga-Nzambi ya Ntete. Ya kele kieleka? Mbote, Yandi fwana sala mutindu mosi.

<sup>289</sup> Ntangu yayi, beno ke na nsatu ya bakalati ya bisambu ve. Ve. Beno ke na nsatu ya kalati ya bisambu ve. Kima kaka yina beno ke na yawu nsatu kele kuvwanda na lukwikilu na Nzambi. Beno kele na lukwikilu, beno kwikila kaka na ntima ya beno ya muvimba yina Yesu Klisto ke belusaka bambevo mpe bantu ya mpasi, mpe kieleka Yandi ke sala yawu.

<sup>290</sup> Ntangu yayi, beto kulumusa bayintu ya beto na mwa ntangu fioti samu na bisambu ntangu yayi, diaka, na ntwala ya konso kima yina me tubama to me salama. Ntangu yayi, mu ke tuba ve ti Yandi ke sala yawu. Mu ke tula kivuvu ti Yandi ke sala yawu. Kasi mu—mu ke kwikila, mpe mu ke tula kivuvu ti Yandi ke sala yawu. Ntangu yayi, kana Yandi ke sala yawu, bantu yikwa na kati ya beno ke kwikila? Beno telemisa diboko ya beno. Bika ti Yandi pesa yawu, ya kele kisambu ya munu.

<sup>291</sup> Tata ya Mazulu, ntangu yayi mu me tuba yina Ndinga ya Nge me tuba, “Bika nionso, samu na kulanda Nge.” Bayina bikaka nyonso, fwana mona Nge. Mpe ata nyonso yina Nge ke sala, bayina ke bika ve disumu mpe ke landa, ata fioti ve ba ke vwanda na lenda ya kubakula. Bayina ke bika disumu, kukondwa lukwikilu . . .

<sup>292</sup> Beto zaba ti disumu kele kukondwa lukwikilu. Ata mutindu beto ke zinga, yina nionso beto ke sala, kana beto ke kwikila kaka ve, beto kele misumuki. Biblia ke tuba, “Yandi yina ke kwikila ve kele yimeni ya kufundisa.” Na yawu beto zaba ti

beto fwana kwikila “konso Ndinga yina ke basika na yinwa ya Nzambi.” Yina ke vwanda dimpa ya beto ya konso kilumbu.

<sup>293</sup> Mpe mu ke sambila, Tata, ti, mutindu mu me tanga na Masonuku na nkokila yayi, Bansilulu ya beno samu na bilumbu yayi ya nsuka, mpe yina beto ke vingila na bilumbu yayi ya nsuka. Kana ya vwandaka kieleka, Mfumu, na yina siamisa Bandinga yayi na bidimbu ke landa. Pesa yawu.

<sup>294</sup> Mu ke kukipesa munu mosi na Nge, mpe Ndinga, mpe bantu. Mu ke sambila, Tata, ti Nge ke zenga bantima kuna, samu na kukwikila na ntima ya bawu ya muvimba, mpe mingi-mingi bayayi yina ke vwanda na ndonga ya bisambu. Mpe na yina bika ti bantu kumona ti Mesiya, Yesu Klisto, Mpeve-Santu, kele na beto na nkokila yayi. Yandi kele na kati ya Dibuundu, Dibuundu ya Kusoola, Nkuna yina ba me bokila na kubasika, Nkuna ya Abraham, na nzila ya nsilulu ya kimfumu. Pesa yawu, na Nkumbu ya Yesu. Amen.

<sup>295</sup> Ntangu yayi, ntangu yayi bika mu tala kaka, mwa ntangu fyoti. Ntangu yayi, beto ke baka kaka ntangu ya beto, baminuti fyoti, kaka baminuti fyoti, pene ya baminuti kumi.

<sup>296</sup> Beno zola Yandi? [Dibuundu me tuba, “Amen.”—Mu.] Beno ke kwikila Yandi? [“Amen.”] Nge ke kwikila bima yayi yina mu me tanga nge na Ndinga na nkokila yayi kele kieleka? [“Amen.”] Beno ke kwikila ti Yesu salaka yawu ntangu Yandi vwandaka na zulu ya ntoto? [“Amen.”] Beno ke kwikila ti Yandi silaka yawu? [“Amen.”] Nge ke kwikila ti beto kele na bilumbu ya nsuka? [“Amen.”] Ntangu yayi, yina kele nsilulu ya Yandi. Yandi fwana zinga yawu. “Kana beno ke vwanda na kati ya Munu, Bandinga ya Munu ke vwanda na kati ya beno, na yina beno lomba yina beno zola. Yawu ke salama samu na beno.” Ntangu yayi, mitifi ya beno mpe lukanu ya beno fwana vwanda ya kusungama. Beno fwana kwikila yawu na ntima ya beno ya muvimba.

<sup>297</sup> Ntangu yayi, mu ke kwikila ve ti ya kele na muntu na ndonga ya bisambu yina mu zaba. Beto kele banzenza. Mu kele nzenza. *Kuna*, banzenza. Beno nionso yina zaba ti mu zaba kima mosi ve samu na beno, beno yina kele na mwa ndonga yayi ya bisambu *awa*, telemisa diboko ya nge, zaba ti mu zaba kima mosi ve samu na nge. Mbote mingi. Nyonso yina *kuna*, yina zaba ti mu zaba nge ve, to zaba kima mosi ve samu na nge, telemisa diboko ya nge, tala kaka. Beno bawu yayi. Na yina, ya kele diambu ya kubumbama. *Beno tala* bayina kele na bakalati ya bisambu. *Ya* kele na mosi kukondwa kisambu. . .

<sup>298</sup> Kalati ya bisambu kele kima ve kasi mwa kalati ya fioti na nimelo na zulu ya yawu. Beno pesa kaka beno lutangu, mwana ya bakala ke kulumuka mpe ke vukisa yawu, mpe muntu nyonso zola kalati ya bisambu lenda kuzwa yawu. Mpe yandi zaba ve, muntu yankaka ve zaba, kisika mu. . . Mbote, yandi ke zaba ve kana bakalati nionso vwandaka ya kuvukisa, kisika mosi

na yankaka. Ata mbala mosi ve ti bawu zaba nani ke vwanda na mulonga ya bisambu, samu ti beto lenda ve kutuba yawu. Bambala mingi, beto ke nata bawu kuna . . .

<sup>299</sup> Ntangu mu bandaka ntete, beto vwandaka na bakala mosi kuna yina vwandaka teka bakalati ya bisambu. Muntu mosi tubaka, “Mu ke pesa nge bankama tanu ya ba-dollar samu na kutula kento ya munu na ndonga.” Beno me mona?

<sup>300</sup> Mu bakaka mwana ya munu mosi. Na yina mu tubaka, “Mwana, samu na kukumisa nge mosi pwelele na bantu, na yina bawu zaba ti nge ke teka ve kalati ya bisambu, beno telama na ntuala ya bawu, beno vukisa bakalati ya bisambu mutindu *yayi*, na yina beno pesa bawu na muntu yina zola. Mpe na ngaanda ya yina, mwana, beno ke zaba ata fioti ve kisika mu ke bokila kubanda tii kuna mu ke kuma kuna.”

<sup>301</sup> Bantu yikwa me monaka yawu na lukutakanu, ntangu na manima ya ntangu? Kaka ntangu nyonso, mu ke soba, mpe ke kwenda *awa, kuna*. Mpe na yina, na ngaanda ya yawu, kisika mosi me beluka na estrade, ya kele na kumi na zole yina ba me bokila *kuna*, beno me mona, ya kele kieleka, kukondwa bakalati ya bisambu.

<sup>302</sup> Na yawu ya kele Mfumu Yesu Klisto yina ke kubwaka ve, mutindu mosi mazono, bubu yayi, mpe kukonda nsuka.

<sup>303</sup> Beno ke bika nyonso, samu na kulanda Yandi? Beno zola kubika kukondwa lukwikilu ya beno, samu na kulanda Yandi samu na kubeluka? Beno bika bima ya beno—ya beno ya yinza, samu na kulanda Yandi na busantu, mpe kutambula samu na Yandi. Beno sala yawu ntangu yayi. Mu ke tuba ve ti Yandi ke sala yawu. Kana Yandi sala yawu, na yina beno ke zaba.

<sup>304</sup> Kento yayi me telama kaka *awa*, yayi kele foto dyaka, mutindu mu tubaka mazono na nkokila, ya Santu Jean 4. Awa kele bakala mpe kento, yina ke kutanaka mbala ya ntete na luzingu. Mpe ya vwandaka na benny ya fioti. Kana beno vwandaka kuna na Samarie, na ngaanda ya Sychar kuna, mwa dibulu ya masa, ya kele na mwa tablo mosi, bayintu ya vinu na lweka ya yawu, mutindu *yayi*. Ya kele kisika yina kento yango vwandaka, vwandaka tuba na Yesu. Bakala mosi, kento mosi, kutanaka na mbala ya ntete. Mpe Yandi tubaka na kento yina vwandaka mpasi ya yandi. Mpasi ya yandi vwandaka, yandi vwandaka musumuki.

<sup>305</sup> Ya lendaka vwanda yandi. Yandi lendaka vwanda musumuki. Yandi lendaka vwanda muntu ya luvunu. Yandi lendaka vwanda santu. Yandi lendaka zola kubeluka samu na nzutu ya yandi. Yandi lendaka zola kubeluka samu na muntu yankaka. Yandi lendaka vwanda mambu ya mbongo. Yandi, mu zaba ve yina yandi kele awa. Mu lenda tuba na beno ve. Yandi me telama kaka kuna, kento. Kaka yina. Ya kele kieleka. Beto me kutanaka ntete ve. Kasi kana Mfumu Yesu ke kwiza awa . . .

306 Ntangu yayi, samu na kubelusa yandi, kana yandi kele ya kubela, mu lenda sala yawu ve. Mu lenda sala ve yina Nzambi salaka. Ntangu yayi, kima kaka. . .

307 Yinki kana Yesu vwandaka ya kutelama awa na kazaka yayi? Kana yandi belama na Yesu mpe tubaka, “Yesu, Nge ke belusa munu?”

308 Mbote, Yandi ke tuba, “Mwana ya munu, mu me sala yawu yimeni. Mu lwalaka samu na masumu ya beno. Na bamputa ya Munu nge me beluka.” Ya kele kieleka? Ya kele kisalu ya kumanisa.

309 Beno kwisa, beno tuba, “Yesu, Nge ke vulusa munu? Nge ke vulusa munu?” Yina kele ve kyuvu. Yandi salaka yawu yimeni.

310 “Mfumu Yesu, mu me ndima Kukatula-masumu ya Nge. Mu kele musumuki.” Beno me mona? Nge kuzwaka mpulusu na manima kuna. Nge belukaka na manima kuna. Nge ndimaka yawu kaka. Na lukwikilu nge me vuluka. Na lukwikilu nge me ndima mpulusu ya nge.

311 Mpe muntu mosi ke kwisa, ke tuba na beno ti bawu kele na ngolo ya kubeluka, mpe bawu lenda belusa beno, beno vwanda. . . beno bikana ntama na yawu, samu ya kele ve mutindu yina. Ngolo ya kubeluka ya nzutu kele na kati ya Klisto, yimeni kisalu yina me mana.

312 Kana muntu mosi me tuba na beno ti Nzambi me pesa yandi ngolo ya kulemvokila masumu ya beno, mpe samu na kusala yawu, beno kwikila yawu ve. Ba me lemvokila bawu yimeni. Yesu ya kutelama awa na nkokila yayi, kima kaka, ya ke tuba ti Yandi vwandaka Mwana ya Nzambi.

313 Yinki ke salama kana Yandi vwandaka. . . Yinki ke salama kana ntangu yayi maboko ya munu vwandaka ya kufuluka na bamputa ya bansoso, mpe menga vwandaka basika na bawu, mpe matiti ya bansende na lweka awa? Yina ke sala dyaka yawu ve Yesu. Yina ke vwanda nsuni ya munu.

314 Mpe beto zaba ti nsuni kele ya kuvwanda na diboko ya kibakala ya Nzambi. Mpe ntangu ya ke kwiza, ntangu ke vwanda dyaka ve. Ya kele kieleka. Ntangu Yesu kulumukaka, kaka yina.

315 Kasi Yandi kele awa na mutindu ya Mpeve. Mpe na yina Luzingu ya Yandi kele na kati ya beno mpe munu, samu na kupesa beno lukwikilu mpe kupesa munu lukwikilu.

316 Ntangu yayi, beno tala awa. Microphone yayi—yayi, kana ya vwandaka ve na ndinga ya moyo awa samu na kutuba yawu, ya ke vwanda nzonzolo mosi ya kufwa. Ya kieleka?

317 Ntangu yayi, beno tala. Beno kuwa mbote, samu ti beno kondwa yawu ve ntangu yayi. Dyambu yayi, kana Nzambi ke sala yawu, ke sukisa dyambu.

318 Ntangu yayi, microphone yayi lenda tuba kima mosi ve, samu ya ke na kima mosi ve ya kutuba. Ya kele kieleka? Ntangu yayi, mutindu kaka miklofone yina lendaka zonza, ya kele samu na kima ya kuzonza na kati ya yawu.

319 Ntangu yayi, munu yandi yayi. Mu zaba ve kento yina, mu me monaka yandi ata fioti ve. Yina kele maboko ya munu na ntuala ya Nzambi, mpe yandi telemisaka maboko ya yandi, ti beto zabaka ve mosi na yankaka. Mu zaba kima mosi ve samu na yandi. Kasi, tii kuna Kima mosi ke kwisa *awa*, samu na kutuba yina ke tambula mbote ve *kuna*, mu kele baba, mpe, samu mu zaba kima mosi ve. Nzambi zaba ti ya kele kieleka. Beno me mona? Ya fwana vwanda Kima mosi ke zonza.

320 Ntangu yayi, beno lenda sala nsodolo ya beno. Kana beno, mutindu Philippe, yandi tubaka. . . To, Nathanael tubaka, “Nge kele Klisto, Mwana ya Nzambi ya moyo. Nge kele Ntinu ya Israel.” Beno me mona? To beno lendaka vwanda bawu tubaka ti ya vwandaka Béelzéboul. Beno me mona kisika bawu kele na nkokila yayi? Mu ke kukiyufula kisika Nathanael kele na nkokila yayi. Yina ke kufwaka ve. Beno me mona? Beno sala nsodolo ya beno. Yina me tala beno. Beno me mona?

321 Kasi ntangu yayi, mu ke tuba yawu, mu ke vingila na kumona kana Yandi ke pesa munu kupakulama. Kana Yandi me pesa ve kupakulama, na yina ya kele kaka na kima mosi mu lenda sala, bankundi, kele kulomba pardo, ti Yandi me kutana na munu ve na nkokila yayi. Mpe na yina beto ke tentika kaka maboko na zulu ya bantu yayi ya kubela mpe ke sambila samu na bawu, mpe kulomba lusakumunu, kusala lubokilu na autel, mpe kukwenda na yinzo. Yawu yina kaka beto lenda sala. Yawu yina kaka mu zaba kusala.

322 Kasi kana Yandi kwisa, na yina mu banza ti mosi na mosi ya beno yina telemisaka diboko ya beno, ti beno zola kumona Klisto, Mu banza ti ya kele kisalu ya beno, kaka na ntangu yayi ke manisa, na kukwiza kaka awa mpe kufukama, mpe kutuba, “Mfumu Yesu, mu me kukipesa munu mosi na Nge.”

323 Samu ti, kana mu kele muntu ya luvunu, Yandi ke siamisa ata mbala mosi ve muntu ya luvunu. Yandi ke vwanda na kima ve ya kusala na disumu. Nzambi ke sala ve. Kasi kana mu me tuba na beno Kieleka, na yina Yandi kele ya kukangama na kisalu na nzila ya Ndinga ya Yandi, na—na—na kulakisa ti ya kele Kieleka.

Nzambi, pesa yawu.

324 Ntangu yayi beno vwanda kaka na buzitu. Beno me mona? Bisika nyonso na kati ya kivinga, beno vwanda kaka na buzitu.

325 Mu fwana tuba na nge na mwa ntangu fioti, mama, kaka kima yankaka. Mu ke na kuwa ve kupakulama na zulu ya munu. Mpe mu—mu zaba nge ve, mpe na yina yawu yina. Ntangu yayi, kima mosi kaka mu zola ti beno sala, kana mu yufula beno kima mosi, beno tuba kaka “yinga” mpe “ve.” Beno me mona? Ntangu

yayi, ya kele samu na yina mu ke na kusalaka yayi. . . Beto baka kaka kima mosi, samu ti ya lenda. . .

<sup>326</sup> Beto zola ve kubika Masonuku. Beno bikana kaka na kati ya Masonuku, na yina beto zaba ti beto kele ya kusungama.

<sup>327</sup> Ntangu yayi, mumbandu, Yesu, ntangu yayi, Yandi vwandaka na yinsi yankaka. Mpe Yandi vwandaka na nzila ya Yandi na Jéricho, yina vwandaka kaka mbala mosi na yisi ya mongo. Kasi Yandi vwandaka na nsatu ya kuluta na Samarie, mutindu *yayi*. Ntangu yayi, Tata fidisaka Yandi kuna. Yesu tubaka. . .

<sup>328</sup> Na kapu yina ke landa, kapu ya 5, ntangu Yandi belusaka muntu yina vwandaka na mpasi. Bamafunda ya bantu vwandaka ya kulala kuna, bankonga ya bikata, bampofu, bankonzo, bantu ya kukondwa ngolo, yina vwandaka vingila kuningana ya masa. Mpe Yesu lutaka, mpe Yandi monaka muntu yina vwandaka na kimbevo ya ntama, mu banza tuberculose, to mpasi ya prostate, to kima mosi. Mpe Yandi salaka yandi nyonso, samu ti Yandi zabaka ti yandi vwandaka kuna, mpe zabaka ti yandi vwandaka mutindu yina. Yandi kwendaka kuna, bikaka nkonga ya bantu yankaka kuna. Yandi kwendaka kuna, ntama. Beto zaba ti ya kele kieleka. Ya kieleka?

<sup>329</sup> Bawu monaka, ba-Juif monaka Yandi, mpe yufulaka Yandi. Bawu yufulaka Yandi diaka na nkokila yayi. “Samu na yinki Yandi salaka? Kana Yandi kele na mawa, mpe ke zolaka bantu nionso, samu na yinki Yandi bikaka nkonga yina ya bikata, bampofu, bankonzo, bantu ya kukondwa ngolo, yina vwandaka ya kulala kuna?”

<sup>330</sup> Yandi belusaka kaka muntu mosi yina vwandaka kieleka ya kubela ve. Yandi zolaka kufwa yandi ve. Yandi vwandaka na yawu, bamvula makumi tatu na nana. Ya vwandaka na manima ya ntangu. Yandi lendaka tambula. Yandi tubaka, “Ntangu mu ke kwenda na kiziba ya maza, muntu mosi ke bula munu kuna.” Beno me mona? “Muntu mosi ke kwisa na ntwala ya munu.” Kasi Yandi salaka nionso yina muntu mosi.

<sup>331</sup> Mpe ntangu ba yufulaka Yandi, awa kele Bampova ya Yandi. Santu Jean 5:19, “Ya kieleka, ya kieleka, mu ke tuba na beno, Mwana lenda sala kima mosi ve na Yandi mosi; kasi yina Yandi ke mona Tata ke sala, Mwana ke sala mutindu mosi.”

Na yina ntangu Yandi kwendaka na Samarie, Mfumu twadisaka Yandi kuna.

<sup>332</sup> Ntangu yayi, Mfumu twadisaka munu, kisadi ya Yandi, na Phoenix. Yandi twadisaka munu awa na nkokila yayi. Ntangu yayi awa mu kele, na kupesaka bamuswa ya Yandi.

<sup>333</sup> Ntangu yayi, ntangu Yesu kwendaka na Samarie, kima ya ntete Yandi monaka vwandaka kento mosi kwisaka na ntwala ya Yandi. Yandi tubaka na yandi tii kuna Yandi monaka kondisyo ya

yandi. Ntangu Yandi tubaka na yandi, na nswalu yandi zabaka ti ya vwandaka to profete to Mesiya ya nsilulu. Yandi tubaka ti Yandi vwandaka Mesiya. Beno me mona?

<sup>334</sup> Na yawu beto zaba ti baprofete vwandaka na bilumbu me luta. Bubu yayi ya kele Klisto. “Nzambi na bantangu mingi mpe na mitindu mingi kuzonzaka na tata na nzila ya profete; na bilumbu yayi ya nsuka na nzila ya Mwana ya Yandi, Klisto Yesu,” yina kele Mpeve-Santu na kati ya beto.

Ntangu yayi Yandi kele awa.

<sup>335</sup> Nge zaba yawu. [Mpangi-kento me tuba, “Yinga.”—Mu.] Mu zola kuyufula nge, mutindu Muklisto mosi na yankaka. Kaka na ntangu mu talaka kuna, beno lendaka tuba kima mosi salamaka, Mpeve mosi ya lembami, ya kukikulumusya. Ya kele kieleka? Beno telemisa diboko ya beno kana ya kele kieleka, na yawu bantu ke mona. Beno me mona? Ntangu yayi, kaka ntangu yayi, na kutalaka kento, kana beno lenda mona yandi (Beno me mona kuna?), Nsemo ya bumbwaki, ke tambula kaka pene-pene ya kento.

<sup>336</sup> Ntangu yayi yandi me katukila munu. Ve. Ya kele samu na muntu yankaka. Ya kele kento yankaka. Ya kele, beno ke sambila samu na kento, muntu yankaka. Ya kele bokilo ya beno. Mpe yandi kele na kimbevo ya ba-rein. Mpe—mpe yandi kele kaka na rein mosi. Mpe beno kele na boma ti ya kele cancer. Mpe ya kele samu na yina beno kele awa, samu na kulomba munu na kusambila samu na yandi. Ya kele MUTINDU ME TUBA MFUMU. Nge ke kwikila? Kwenda, kwikila na ntima ya nge ya muvimba, mpe ba ke ningisa yawu ve. Kutula ntembe ve. Beno baka mwa kima yina beno ke na yawu na diboko ya beno, beno tala yawu na zulu ya yandi.

<sup>337</sup> Nge ke kwikila na ntima ya nge ya muvimba?

<sup>338</sup> Wapi faso? Beto kele banzenza, mpe, mosi na yankaka. Lukutakanu ya beto ya ntete. Mpe kana . . . Nzambi, na nzila ya Mwana ya Yandi, Yesu Klisto, me fidisa Mpeve ya Yandi. Yesu tubaka, “Kisika zole to tatu me vukana na Nkumbu ya Munu, Mu ke vwanda na kati-kati ya bawu.” Yina kele nsilulu ya Yandi, mutindu yina ve? Ntangu yayi, Yandi lenda vutuka ve na nsilulu ya Yandi.

<sup>339</sup> Kima mosi kaka, ti, beto kele ya kulemba mingi na lukwikilu, tii beto ke mona Yandi ve. Ya kele samu na yina Nzambi ke fidisaka baprofete na ntoto. Beno me mona, bantu ke tangaka ve Biblia ya bawu, mpe bawu—bawu ve, bawu ke kwenda kaka, na yawu Nzambi ke tindaka bawu ntangu nionso kidimbu. Mpe ntangu nionso profete kele kidimbu. Beno me mona? Mpe bubu yayi Mpeve-Santu kele Kidimbu ya beto, samu ti Yandi kele Profete ya Nzambi ke tambula na kati ya beto. Yandi kele Profete ya Nzambi, Kidimbu ya bilumbu ya nsuka.



<sup>340</sup> Ntangu yayi, na kuzabaka beno ve, mpe na kuzabaka kima mosi ve na beno. Kasi kana Mfumu Yesu Klisto, yina mu me tuba yawu, na kati ya Biblia, ke zonza na nzila ya munu mpe tuba na munu yina nge me telema kuna, ya ke sala ti nge kwikila? [Mpangi-kento me tuba, “Yinga.”—Mu.] Ya ke sala ti bantu kukwikila?

Ntangu yayi, Tata ke na kuwa. Mu zaba.

<sup>341</sup> Nge ke na kimbevo ya kidi-kidi. Ya kele kieleka. Kana ya kele kieleka, telemisa diboko ya nge.

<sup>342</sup> Ntangu yayi, muntu mosi kuna banzaka ti mu banza yawu. Ntangu yayi, beno lenda bumba yawu ve ntangu yayi, mpangi-bakala. Ya ke na kwiza awa. Beno me mona? Mu kele na yawu. Beno kwikila yawu ve. Beno kwikila yawu ata mbala mosi ve. Ya kele disumu. Ya kele kukondwa lukwikilu. Nzambi ke bedisa beno samu na yawu. Beno ke pesa mvutu na Kilumbu ya Lufundusu. Mu lendaka bokila yawu, kasi ntangu nyonso mu ke kotaka na mpasi.

<sup>343</sup> Mu zaba ve yina Yandi tubaka na beno. Kaka mwa ntangu fyoti. Yinga, ya kele, kivudi. Ya kele kidi-kidi, kulemba. Nge me lemba na nzila ya yawu, nge me vwalangana, nge me kuzwa yawu kubanda ntama. Yina kele kieleka. Nge kele dyaka na bampasi yankaka, dyaka. Nge ke na muntu yina nge ke na kusambidila. Bakala ya nge, na lupitalu, na mpasi ya estomac, yandi vwandaka kaka na lipaso. Mama Good, vutuka na yinzo, kwikila na ntima ya nge ya muvimba. Mpe tula yawu na zulu ya yandi, mpe yandi ke—yandi ke beluka. Nzambi sakumuna nge.

<sup>344</sup> Yandi zaba nge? Beno me mona? Kieleka, Yandi zaba yawu. Mu me mona. Ya kele. . . Beno ke bakula ve ti Yesu mosi yina tambulaka na Galilée kele Yesu mosi yango awa na nkokila yayi? Beno lenda bakula yawu ve?

<sup>345</sup> Ntangu yayi, mu zaba kima ve na yina me tala. . . Mu banza ti ba sambilaka kento yango, kaka *kuna*. Ya kele kieleka? Beno nionso bantu me zabaka kento yina? Muntu nionso me zaba kento yina? Beno telemisa diboko ya beno. Bima yina vwandaka ya kusungama? Beno ningisa maboko ya beno, kana ya kele mutindu yina. Kaka *kuna*. Ya kele mbote.

<sup>346</sup> Kwisa. Tuba Kingelesi? [Mpangi-bakala me tuba, “Yinga, tata.”—Mu.] Ya kele mbote mingi. Indien? [“Indien.”] Mu kele na buzitu samu na nge; American ya kieleka. Mu banza ve. . . Munu, kaka mutindu muntu mosi, mu lenda baka lukanu mosi ve. Mu lenda baka kaka lukanu ya munu mosi. Mu ke banza ti nge me baka ve lukanu ya mbote. Nge zaba ti mu zaba ve. Mu banza, na kisika ya kufidisa mafuku mpe byazi ya ba-dollar, na bayinsi ya nzenza, ba zolaka keba beno. Kieleka. Kieleka. Kieleka kaka. Ntima ya munu ke kwendaka ntangu nyonso samu na beno. Mu vwandaka kuna na ba-reservatoire na San Carl, ntama mingi ve.

Mutindu Mpeve-Santu kotaka kuna, belusaka bantu yango ya mputu!

347 Mu kele nzenza samu na nge, tata. Mu zaba nge ve. Mu me monaka nge ntete ve na luzingu ya munu. Beto kele ya muvimba banzenza. Ya kieleka. Beto kele na bayinsi zole. Mu kele Anglo-Saxon; beno ba-Indien. Mu ke na mwa menga na kati ya munu kubanda mama ya munu. Nkooko ya munu ya kento vwandaka Cherokee. Mu ke na lulendo ya yawu. Kieleka. Kasi mutindu mpangi ya munu ya bakala, mu ke sala kima mosi ve samu na kuniongisa beno. Mu ke sadisa beno kaka.

348 Dikanda ya ba-Indien, vwanda vwandaka, kana bawu vwandaka na mosi na kati ya bawu, yina lendaka zabisa na ntwala mpe kulakisa kisika nsaka vwandaka, yandi kumaka profete na kati-kati ya bawu. Mpe bawu vwandaka . . . Kasi kana yandi tubaka na ntwala kima yina vwandaka mbote ve, yandi zolaka kufwa samu na yawu. Yandi zolaka vwanda na yawu. Ya kele kieleka. Ba vwandaka ve na kima mosi na bawu.

349 Kana Nzambi kele Nzambi . . . Yinsi lendaka pesa beno diambu ya yimbi, kasi Nzambi ke pesa beno ata fioti ve. Yandi fidisaka Mwana ya Yandi samu na beno.

350 Mu me mona kaka yina me salama. Nge me katuka na lupitalu. Uh-huh. Nge ke kwisa awa samu ba sambila nge. Nge ke na mpasi ya estomac, mpe kuna samu na lipaso. Ya kele MUTINDU ME TUBA MFUMU. Kwisa awa.

Tata ya Mazulu, mu ke fundisa mpasi yayi ya estomac.

351 Satana, nge me bumbama na dokotolo, kasi nge ke bumbama ata fioti ve na Nzambi. Basika na yandi, na Nkumbu ya Yesu Klisto. Amen.

Beno vwanda ve na boma samu na yawu. Beno landila, beno vwanda mbote mingi.

Nge ke kwikila?

Wapi faso?

352 Mama yayi ya fioti me vwanda *awa*, ke sambila, kaka na manima ya kento yayi ya ntwenya yina vwandaka na ntwala, na mpasi ya vessie, nge ke kwikila ti Mfumu Yesu ke belusa nge, mama? [Mpangi-kento me tuba, “Mu ke kwikila ti Yandi salaka yawu.”—Mu.] Yawu yina.

353 Tuba na munu Nani yandi simbaka. Yandi kele na bametele yivwa na munu. Yandi simbaka Nganga-Nzambi ya Ntete, ya kele kieleka, yina lenda simbama na bansatu ya bimbevo ya beto. Beno ke kwikila yawu ve?

354 Nge ke kwikila, mama? [Mpangi-kento me tuba, “Yinga.”—Mu.] Nge ke kwikila ti Nzambi lenda tuba na munu yina kele mpasi ya nge? [“Yinga, mu ke kwikila.”] Ya kele nge ve yina kele na mpasi, ya kele mpangi ya nge ya kento. Yandi kele na cancer.

Ya kele kieleka. Ve . . . Kwikila, kusala ntembe ve. Baka muswale yina nge ke na yawu, mpe tula yawu na zulu ya yandi. Kwikila na ntima ya nge ya muvimba. Yandi ke basika na yawu, kana beno ke kwikila yawu na ntima ya beno ya muvimba. Beno kwenda na ntwala. Uh-huh.

355 Vwanda na lukwikilu. Nge ke kwikila yawu na ntima ya nge ya muvimba?

Ya me bika estrade. Ya kele na kati ya kivinga.

356 Ya kele mwa kento, ya kuvwanda kaka na manima kuna, yina kele na tuberculose. Yandi kele ya kuvwanda na manima kuna, ke sambila. Nge ke kwikila ti Nzambi ke belusa nge? Nge ke kwikila? Mama ya ntwenya yina ke na kutala kaka kuna na ntwala, kuna na nsuka. Telemisa diboko ya nge, na manima kuna, mama, kaka na manima ya bakala yina ke baluka. Kwikila na ntima ya nge ya muvimba. Yinga. Mwa, kento yina me zengisa bansuki. Mbote mingi. Yawu yina. Kwikila yawu, mpe yawu me mana.

357 Yinki yandi simbaka, kuna na manima? Mu ke tula ntembe na beno na kukwikila yawu.

358 Yinki samu na nge, mama? Nge ke kwikila ti mpasi ya mukongo me katukila nge, kubanda nge me telema awa? Mbote, na yina, kwenda kaka na ntwala. Yawu yina kaka beno fwana sala. Beno kwikila yawu na nionso yina kele na kati ya beno.

359 Nge vwandaka na kima mutindu mosi. Na yawu kana nge ke kwikila kaka, landila kaka na kutambula, na kutubaka, “Matondo na Nge, Mfumu. Belusa yawu.” Kwikila na ntima ya nge ya muvimba.

360 Nge ke na boma ti nge ke vwanda kikata na arthrite. Mutindu yina ve? Na yina kana beno ke kwikila, beno kwikila na ntima ya beno, beno kwenda kwikila na ntima ya beno ya muvimba, mpe beno beluka. Yawu yina kaka beno fwana sala, ya kele kukwikila.

361 Beno ke kwikila? Wapi mutindu samu na bayankaka ya beno bantu kuna? Beno kele na lukwikilu, na kukwikilaka?

362 Yinki kana mu tubaka na nge Yesu belusaka nge, ya kutelama kuna, nge ke kwikila yawu? [Mpangi-kento me tuba, “Amen.”—Mu.] Beno banda kaka na kutambula, beno me mona, na kukwikilaka na ntima ya beno ya muvimba.

363 Nge ke zola kuvutuka na yinzo, kudya madia ya nge ya nkokila? Kwikila ti kimbevo ya kudasuka ya estomac ya ntama me bika nge? Kwenda na ntwala, kudya kana nge zola. Kwikila.

Nge ke kwikila?

364 Yinki samu na kento yina me vwanda kuna, ke sambila samu na mwana yina ya fioti, mwana yina, kele na mpasi ya menga?

Nge ke kwikila ti Nzambi ke belusa mwana yayi? Mbote mingi, nge lenda kuzwa yawu.

365 Yina simbaka mama yina, kaka—kaka na ntwala ya nge kuna. Yandi kele ya kuvwanda kuna ke na kusambilaka samu na kimbevo ya kudasuka, ya kele kieleka, yina ke landana na nge. Mpe, nge kele na mpangi ya bakala yina kele na kimbevo ya yintu. Ya kele kieleka. Beno kele na mama yina kele na disu ya yimbi. Kana beno ke kwikila na ntima ya beno ya muvimba, Nzambi ke belusa bawu. Amen.

366 Nge ke kwikila Yandi?

367 Yinki samu na beno awa, na kiti ya bambevo? Beno ke kwikila? Yina kele mwana ya nge ya bakala ya kuvwanda kuna, yina me tuba kaka mutindu yina. Yina kele mwana ya nge. Nge kele na cancer na kizizi ya nge. Beno ke na kuwa mpasi. Beno ke na kusosa mbotika ya Mpeve-Santu. Ya kieleka. Kana nge ke kwikila yawu na ntima ya nge ya muvimba! Nge ke kwikila yawu samu na yandi, mwana? Nge ke kwikila yawu na ntima ya nge ya muvimba? Tuba na yandi na dikutu ya yandi. Tentika diboko ya nge na zulu ya yandi, mpe ti yandi kuzwa mbotika ya Mpeve-Santu.

368 Nge ke kwikila ti Yesu Klisto kele mutindu mosi mazono, bubu yayi, mpe kukonda nsuka?

369 Beno ke kwikila Mesiya, Mesiya ya nene ya Nzambi, ke tambula na kati-kati ya bantu ya Yandi?

370 Beno zola kubika nyonso mpe kulanda Yandi? Kana beno kele, beno telemisa maboko ya beno na Yandi, mpe beno tuba, “Mu ke landa Yandi. Mu ke landa Yandi. Mu ke kwikila Yandi. Konso Ndinga yina Yandi tubaka, mu ke kwikila Yandi. Mu ke sungika luzingu ya munu. Mu ke sala samu na Yandi.” Nzambi vwanda na kyadi! Nzambi sakumuna nge.

371 Bakwikidi yikwa kele na kati awa ntangu yayi? Beno telemisa diboko ya beno.

372 Bantu yikwa zola kubelama na Yandi? Beno telemisa diboko ya beno. Bayina nionso ke zola kubelama na Yandi mpe kundima Yandi malu-malu yayi, Yandi kele kaka awa. Yayi kele Mvwandulu ya Yandi.

373 Bakala yina na manima kuna na mpasi ya prostate, yimeni, mpangi-bakala. Nzambi belusaka nge kaka na ntangu yina.

374 Na yina, Ya ke kwenda kaka bisika nyonso mutindu yina, na kati ya Nsemo, ke baluka bisika nyonso na kivinga. Kima lenda salama kaka na ntangu yayi. Beto lenda kuzwa pantekote yankaka, kana beno ke kwikila kaka yawu.


375 Beno telama, beno nionso. Beno telemisa maboko ya beno na Nzambi. Beno pesa Yandi lukumu.

<sup>376</sup> Matondo na Nge, Mfumu Yesu. Beto ke sambilaka Nge, Tata, samu ti Nge kele Mvulusi ya beto mpe Nzambi ya beto. Nge kele awa. Nge me siamisa Ndinga. Nge me siamisa ti Yawu kele kieleka. Nge kele Nzambi, Mesiya, mutindu mosi mazono, bubu yayi, mpe kukonda nsuka. Kukondwa kubwa, kukondwa ntembe, Nge kele Mfumu Yesu mosi. Lukumu na Nkumbu ya Yandi ya santu!

<sup>377</sup> Beno zola Yandi? Beno tuba, “Amen.” [Dibuundu me tuba, “Amen.”—Mu.]

<sup>378</sup> Bantu yikwa na kati ya beno kele bakwikidi ntangu yayi? Beno telemisa diboko ya beno. Ntangu yayi, Yesu tubaka yayi, Yandi mosi, “Bidimbu yayi ke landa bayina ke kwikila. Kana bawu tentika maboko ya bawu na zulu ya bambevo, bawu ke beluka.” Mu kele kaka ve yandi yina kele na Mpeve-Santu. Beno kele na Yawu, mpe. Beno kele mukwikidi, kaka mutindu mu kele mukwikidi. Ntangu yayi beno bika bantembe ya beno nionso.

<sup>379</sup> Tula diboko ya nge na zulu ya muntu mosi mpe kwikila ti Nzambi ke belusa muntu yina, landila Ndinga ya Yandi. Kana Yandi ke zitisa mutindu yayi. . . Beno tentika diboko ya beno na zulu ya muntu, beno kwenda sambila samu na bawu, beno tuba, “Mfumu, belusa muntu yina.” Beno sambila mpe beno mona yina ke salama. Beno kele mukwikidi.

<sup>380</sup> Nzambi ya Ngolo nyonso, na Nkumbu ya Yesu Klisto beto nungaka dyabulu. Beto me semba yandi, mpe me pasula ngolo ya yandi na yandi. Na bamputa ya Mfumu Yesu Klisto beto me kuma mbote. 

62-0123 Kubika Nionso  
Dibuundu Sunnyslope Assembly Of God  
Tempe, Arizona U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kiasadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)